

Во СВЯТЫЙ И ВЕЛИКИЙ ПЯТОК ВЕЧЕРА

О десятом часе дне (в 4-м часу дня – А.Р.) клевет. И благословившу священнику, начинающуся святильничному, на Господи, воззвах, поставим стихов 6: И поем стихиры самогласны.

Глас 1:

Вся тварь изменяшеса страхом, * зрящи Тя на Кресте висима, Христе: * солнце омрачашеса, * и земли основания сотрясахуса, * вся сострадаху Создавшему вся. * Волею нас ради претерпевый Господи, * слава Тебе. [Дважды.]

Глас 2:

Людие злочестивии и беззаконнии * вскую поучаются тщетным? * Вскую Живота всех на смерть осудиша? * Велие чудо, яко Создатель мира в руки беззаконных предается, * и на древо возвышается Человеколюбец, * да яже во аде узники свободит, зовущия: * Долготерпеливе Господи, слава Тебе.

Днесь, зрящи Тя, Непорочная Дева, * на Кресте Слово возвышаема, * рыдающе матернею утробою, * уязвляшеса сердцем горце, и стенияще болезненно из глубины души, * лице со власы терзающе. * Темже и перси биюще, взываше жалостно: * увы Мне, Божественное Чадо! * Увы Мне, Свете мира! * Что зашел еси от очию Моею, Агнче Божий? * Темже воинства безплотных, трепетом содержими бяху, глаголюще: * Непостижиме Господи, слава Тебе.

На древе видящи висима, Христе, * Тебе всех Зиждителя и Бога, безсеменно Рождающая Тя вопияше горько: * Сыне Мой, где доброта зайде зрака Твоего? * Не терплю зрети Тя неправедно распинаема. * Потщися убо, востани, яко да вижу и аз * Твое из мертвых тридневное Воскресение.

Глас 6:

Днесь Владыка твари предстоит Пилату, * и Кресту предается Зиждитель всех, * яко агнец приводимъ Своею волею: * гвоздьми пригвождается, и в ребра прободается, * и губою напояется манну одождивый, * по ланите заушается Избавитель мира, * и от Своих раб поругается Создатель всех. * О Владычняго Человеколюбия! * О распинающих моляше Своего Отца, глаголя: * Отче, остави им грех сей: * не ведят бо беззаконнии, * что неправедное содевают.

Слава, глас тойже:

О како беззаконное сонмище Царя твари осуди на смерть, * не устыдеша благодеяния, * яже воспоминая предутверждаше, глаголя к ним: * людие Мои, что сотворих вам? * Не чудес ли исполних Иудею? * Не мертвецы ли воскресих едином словом? * Не всякую ли болезнь исцелих и недуг? * Что убо Ми воздаете? Вскую не помните Мя? * За исцеления раны Мне наложивше, * за живот умерщвляюще, вешающе на древе, яко злодея, * Благодетеля: яко беззаконна, Законодавца: * яко осужденна, всех Царя. * Долготерпеливе Господи, слава Тебе.

И ныне, глас тойже:

Страшное и преславное таинство днесь действуемо зрится: * неосязаемый удерживается: * вяжется, разрешаяй Адама от клятвы: * испытуй сердца и утробы, неправедно испытуется: * в темнице затворяется, Иже бездну затворивый: * Пилату предстоит, Емуже трепетом предстоят небесныя силы: * заушается рукою

создания Создатель: * на древо осуждается, судяй живым и мертвым: * во гробе заключается Разоритель ада. * Иже вся терпий милосердно * и всех спасый от клятвы, * Незлобиве Господи, слава Тебе.

Вход со Евангелием. Свете тихий:

Прокимен, глас 4: Разделиша ризы Моя себе * и о одежди Моей меташа жребий.

Стих: Боже, Боже Мой, вонми Ми, вскую оставил Мя еси?

Исхода чтение. [Глава 33.]

Глагола Господь к Моисею лицом к лицу, якоже аще бы кто возглагола к своему другу, и отпускашея в полк: слуга же Иисус сын Навин юноша не исхождаше из скинии. И рече Моисей ко Господу: се Ты мне глаголеши, изведи люди сия. Ты же не явил ми еси, кого послещи со мною. Ты же мне рекл еси: вем тя паче всех, и благодать имаши у Мене. Аще убо обретох благодать пред Тобою, яви ми Тебе Самаго, да разумно вижду Тя: яко да обрет буду благодать пред Тобою, и да познаю, яко людие Твои язык велик сей. И глагола [ему Господь]: Аз Сам предыду пред Тобою, и упокою тя. И рече к Нему Моисей: аще Сам Ты не идеши с нами, да не изведеш ми отсюда. И како ведомо будет воистинну, яко обретох благодать у Тебе, аз же и людие Твои, точию идущу Ти с нами: и прославлен буду, аз же и людие Твои, паче всех язык, елицы суть на земли? Рече же Господь к Моисею: и сие тебе слово, еже рекл сей, сотворю: обрел бо сей благодать предо Мною, и вем тя паче всех. И глагола Моисей: покажи ми славу Твою. И рече [Господь к Моисею]: Аз предыду пред тобою славою Моею, и воззову о имени Моем, Господь пред тобою: и помилую, егоже аще милую: и ущедрю, егоже аще щедрю. И рече: не возможеши видети Лица Моего, не бо узрит человек Лице Мое, и жив будет. И рече Господь: се место у Мене, и станеша на камени. Егда же преидет Слава Моя, и положу тя в раселине камени, и покрыю рукою Моею над тобою, дондеже мимоиду. И отыму руку Мою, и тогда узриши задняя Моя: Лице же Мое не явится Тебе.

Прокимен, глас 4: Суди, Господи, обидящия мя, побори борющия мя.

Стих: Приими оружие и щит, и востани в помощь мою.

Иова чтение. [Глава 42.]

Господь благослови последняя Иовля, неже прежняя: бяху же скоти его, овец четырнадцать тысящ, вельблюдов шесть тысящ, супруг волов тысяща, ослиц стадных тысяща. Родиха же ся ему сынове седмь, и дщери три. И нарече первую убо, День: вторую же Кассию: третью же, Амалфеев рог. И не обретошася подобни в лепоте дщерем Иовлевым в поднебесней: даде же им отец наследие в братии их. Поживе же Иов по язве лет сто семьдесят: всех же лет поживе двести сорок четыре. И виде Иов сыны своя, и сыны сынов своих, даже до четвертого рода: и скончася Иов стар, и исполнь дней. Писано же есть паки, востати ему, с нимже Господь возставит и: тако толкуется от сирския книги. В земли убо живый Авситидийстей, на пределех Идумей и Аравии: прежде же бяше имя ему Иоав. Возем же жену аравляныню, роди сына, емуже имя Еннон. Бе же той

отца убо Зарефа, Исавовых сынов сын, матере же Восорры, якоже быти ему пятому от Авраама.

Пророчества Исаиина чтение. [Глава 52.]

Тако глаголет Господь: се уразумеет отрок Мой, и вознесется и прославится зело. Якоже ужаснутся о Тебе мнози, тако обезславится от человек вид Твой, и слава Твоя от сынов человеческих. Тако удивятся языцы мнози о Нем, и заградят царие уста своя: яко имже не возвестися о Нем, узрят, и иже не слышаша, уразумеют. Господи, кто верова слуху нашему? И мышца Господня кому открыся? Возвестихом, яко Отроча пред ним, яко корень в земли жаждущей, несть вида Ему, ниже славы: и видехом Его, и не имяше вида, ни доброты. Но вид Его безчестен, умален паче всех сынов человеческих: человек в язве сый, и ведый терпети болезнь, яко отворится Лице Его, безчестно бысть, и не вменися. Сей грехи наша носит, и о нас болезнует, и мы вменихом Его быти в труде, и в язве от Бога, и во озлоблении. Той же язвен бысть за грехи наша, и мучен бысть за беззакония наша, наказание мира нашего на Нем, язвою Его мы исцелехом. Все яко овцы заблудихом: человек от пути своего заблуди, и Господь предаде Его грех ради наших. И Той, зане озлоблен бысть, и не отверзает уст Своих: яко овча на заколение ведеса, и яко агнец пред стригущим Его безгласен, тако не отверзает уст Своих. Во смирении Его суд Его взятся, род же Его кто исповесть? Яко возьмется от земли живот Его, ради беззаконий людей Моих ведеса на смерть. И дам лукавья вместо погребения Его, и богатя вместо смерти Его: яко беззакония не сотвори, ниже обретеса лесь во устех Его. И Господь хочет очистити Его от язвы: аще дастся о гресе, душа ваша узрит семя долгоживотное. И хочет Господь рукою Своею отъяти болезнь от души Его, явити Ему свет, и создати разумом, оправдати праведнаго благослужаща многим, и грехи их Той понесет. Сего ради Той наследит многих, и крепких разделит корысти: зане предана бысть на смерть душа Его, и со беззаконными вменися, и Той грехи многих вознесе, и за беззакония их предан бысть. Возвеселися, неплоды нераждающая, возгласи и возопий, нечревоболевшая, яко многа чада пустя паче, нежели имущая мужа.

Прокимен Апостола, глас 6: Положиша Мя в рове преисподнем, * в темных и сени смертней.

Стих: Господи Боже спасения Моего, во дни воззвах и в нощи пред Тобою.

Апостол к Коринфянам, зачало 125:

Братие, слово крестное погибающим убо юродство есть, а спасаемым нам сила Божия есть. Писано бо есть: погублю премудрость премудрых, и разум разумных отвергу. Где премудр? Где книжник? Где совопросник века сего? Не обуи ли Бог премудрость мира сего? Понеже бо в премудрости Божией не разуме мир премудростию Бога, благоизволил Бог буйством проповеди спасти верующих. Понеже и иудее знамения просят, и еллини премудрости ищут. Мы же проповедуем Христа распята, иудеем убо соблазн, еллином же безумие. Самем же званым, иудеем же и еллином, Христа, Божию силу и Божию премудрость. Зане буже Божие, премудрее человек есть, и неможное Божие крепчае человек есть. Видите бо звание ваше, братие, яко не мнози ли премудри по плоти; не мнози

сильни; не мнози ли благородни. Но буяя мира избра Бог, да премудрыя посрамит, и немощная мира избра Бог, да посрамит крепкая. И худородная мира, и уничиженная избра Бог, и не сущая, да сущая упразднит, яко да не похвалится всяка плоть пред Богом. Из негоже вы есте о Христе Иисусе, иже бысть нам премудрость от Бога, правда же и освящение, и избавление. Да, якоже пишется, хваляйся, о Господе да хвалится. И аз пришед к вам, братие, приидох не по превосходному словеси, или премудрости, возвещая вам свидетельство Божие. Не судих бо ведети что в вас, точно Иисуса Христа, и Сего распята.

Аллилуиа, глас 1: Спаси Мя, Боже, яко внидоша воды до души Моя.

Стих: Поношение чаяше душа моя и страсть.

Стих: Да помрачатся очи их, еже не видети.

Евангелие от Матфея, зачало 110:

Во время оно, совет сотвориша вси архиерее и старцы людстии на Иисуса, яко убити Его. И связавше Его ведоша, и предаша Его Понтийскому Пилату игемону. Тогда виде Иуда предавый Иисуса, яко осудиша Его, раскаявся возврати тридесять сребреники архиереем и старцем, глаголя: согреших, предав кровь неповинную. Они же реша: что есть нам? Ты узриши. И поверг сребреники в церкви, отыде, и шед удавися. Архиерее же приемше сребреники, реша: недостойно есть вложить их в корвану, понеже цена крове есть. Совет же сотворше, купиша ими село скудельниче, в погребание странным. Темже наречесе село то, село крове, до сего дне. Тогда сбытсся реченное Иеремием пророком, глаголющим: и прияша тридесять сребреник, цену Цененнаго, Егоже цениша от сынов Израилев. И даша я на селе скудельничи, якоже сказа мне Господь. Иисус же ста пред игемоном. И вопроши Его игемон, глаголя: Ты ли еси Царь Иудейский? Иисус же рече ему: ты глаголеши. И егда Нань глаголаху архиерее и старцы, ничесоже отвечаваше. Тогда глагола Ему Пилат: не слышиши ли, колико на Тя свидетельствуют? И не отвеча ему ни к единому глаголу, яко дивитися игемону зело. На всяк же праздник обычай бе игемону отпущати единаго народу связня, егоже хотяху. Имяху же тогда связана нарочита, глаголемаго Варавву. Собранным же им, рече им Пилат: кого хотите от обою отпущу вам; Варавву ли, или Иисуса глаголемаго Христа? Ведяше бо, яко зависти ради предаша Его. Седящу же ему на судищи, посла к нему жена его, глаголющи: ничтоже тебе, и Праведнику Тому, много бо пострадах днесь во сне Его ради. Архиерее же и старцы наустиша народы, да испросят Варавву, Иисуса же погубят. Отвещав же игемон рече им: кого хотите от обою отпущу вам? Они же реша: Варавву. Глагола им Пилат: что убо сотворю Иисусу, глаголемому Христу? Глаголаша ему вси: да распят будет. Игемон же рече: кое убо зло сотвори? Они же излиха вопияху, глаголюще: да пропят будет. Видев же Пилат, яко ничтоже успевае, но паче молва бывает, приемь воду, умы руце пред народом, глаголя: неповинен есмь от крове Праведнаго Сего, вы узрите. И отвечающе вси людие, реша: кровь Его на нас, и на чадах наших. Тогда отпусти им Варавву, Иисуса же бив, предаде им, да Его пропнут. Тогда воины игемоновы, приемше Иисуса на судище, собраша Нань все множество воин. И совлекше Его, одеяша Его хламидою червленою. И сплетше венец от терния, возложиша на главу Его, и трость в десницу Его. И поклоньшися на колenu пред Ним, ругахуся Ему, глаголюще: радуйся, Царю

Иудейский. И плюнувшие Нань, прияша трость, и бияху по главе Его. И егда поругашася Ему, совлекоша с Него багряницу, и облекоша Его в ризы Его, и ведоша Его на пропятие. Исходяще же обретоша человека Киринейска, именем Симона, и сему задеша понести крест Его. И пришедше на место нарицаемое Голгофа, еже есть Краниево место, даша Ему пити оцет с желчию смешен, и вкушь не хотяше пити. Распещи же Его разделиша ризы Его, вергше жребия. И сядяще стражаху Его ту. И возложиша верху главы Его виноу Его написану: Сей есть Иисус, Царь Иудейский. Тогда распяша с Ним два разбойника, одинаго одесную, и одинаго опуюю. Един же от обещеною злодею хуляше Его, глаголя: аще Ты еси Христос, спаси Себе и наю. Отвещав же другой, прещаше ему, глаголя: ни ли ты боишися Бога, яко в томже осужден еси? И мы убо в правду, достойная бо по делом наю восприемлева, Сей же ни одинаго зла сотвори. И глаголаше Иисусови: помяни мя, Господи, егда приидеши во Царствии Си. И рече ему Иисус: аминь глаголю тебе, днешь со Мною будеши в раи. Мимоходящии же хуляху Его, покиваяюще главами своими, и глаголюще: разоряй церковь и трети деньми созидай, спасися Сам, аще Сын еси Божий, сниди со креста. Такожде же и архиерее ругающеся с книжники, и старцы, и фарисеи, глаголаху: инья спасе, Себе ли не может спасти? Аще Царь Израилев есть, да снидет ныне со креста, и веруем в Него. Упова на Бога, да избавит ныне Его, аще хочет Ему, рече бо, яко Божий есмь Сын. Тожде же и разбойника распятая с Ним поношаста Ему. От шестаго же часа тьма бысть по всей земли, до часа девятаго. О девятем же часе возопи Иисус гласом велиим, глаголя: Или, Или, лима савахфани? Еже есть, Боже Мой, Боже Мой, вскую Мя еси оставил? Нецыи же от ту стоящих слышавше, глаголаху, яко Илию глашает Сей. И абие тек един от них, и прием губу, исполнив же оцта, и вонзе на трость, напаяше Его. Прочии же глаголаху: остави, да видим, аще приидет Илиа спасти Его. Иисус же, паки возопив гласом велиим, испусти дух. И се, завеса церковная раздрася на двое, с вышняго края до нижняго; и земля потрясеся, и камение распадеся. И гроби отверзошася, и многа телеса усопших святых восташа. И изшедше из гроб по воскресении Его, внидоша во святыи град, и явишася мнозем. Сотник же и иже с ним стрегущии Иисуса, видевше трус и бывшая, убояшася зело, глаголюще: воистинну Божий Сын бе Сей. Иудее же, понеже пяток бе, да не останут на кресте телеса в субботу, бе бо велик день тоя субботы, молиша Пилата, да пребиют голени их, и возмут. Приидоша же воины, и первому убо пребиша голени, и другому распятому с Ним. На Иисуса же пришедше, яко видеша Его уже умерша, не пребиша Ему голений. Но един от воин копием ребра Ему прободе, и абие изыде кровь и вода. И видевый свидетельствовав, и истинно есть свидетельство его, и той весть, яко истину глаголет, да вы веру имете. Быша бо сия, да сбудется Писание: кость не сокрушится от Него. И паки другое Писание глаголет: воззрят Нань, Егоже прободоша. Бяху же ту и жены многи издалуче зряще, яже идоша по Иисусе от Галилеи, служаще Ему. В нихже бе Мария Магдалина и Мария Иаковля, и Иосии мати, и мати сыну Зеведеову. Позде же бывшу, прииде человек богат от Аримафеа, именем Иосиф, иже и той учися у Иисуса. Сей приступль к Пилату, проси телесе Иисусова. Тогда Пилат повеле дати тело. И приемь тело Иосиф, обвит е плащаницею чистою, и положи е в новом своем гробе, иже изсече в

камени. И возвалив камень велий над двери гроба, отиде. Бе же ту Мария Магдалина, и другая Мария, сидяще прямо гроба.

Таже обычная ектения: Рцем вси от всея души: И потом:

Сподоби Господи, в вечер сей, без греха сохранитися нам *(поклон)*.
Благословен еси Господи Боже отец наших *(поклон)*, и хвально и прославлено имя Твое во веки, аминь *(поклон)*.
Буди Господи, милость Твоя на нас, якоже уповахом на Тя. Благословен еси Господи, научи нас оправданием Твоим; благословен еси Владыко, вразуми нас оправданием Твоим; благословен еси Святыи, просвети нас оправданием Твоим. Господи, милость Твоя во веки, и дела руку Твоею не презри. Тебе подобает хвала, Тебе подобает пение. Тебе слава подобает, Отцу и Сыну и Святому Духу, ныне и присно и во веки веком, аминь.

И ектения: Исполним вечернюю молитву: И прочая.

И по возгласе поем от стиховных стихир подобны 4:

Глас 2:

Егда от древа Тя мертва, * Аримафей снят всех Живота, * смиренною и плащаницею Тя, Христе, * обвив, и любовию подвизашеся, * сердцем и устнами Тело нетленное Твое облобызати. * Обаче одержимъ страхом, радуяся, вопияше Ти: * слава низхождению Твоему, Человеколюбче.

Стих: Господь воцарися, в лепоту облечеса.

Егда во гробе нове за всех положился еси, * Избавителю всех, ад всесмехливый, * видев Тя, ужасеся, верей сокрушишася, * сломишася врата, гроби отверзошася, * мертвии восташа, * тогда Адам, благодарственно радуяся, * вопияше Тебе: * слава низхождению Твоему, Человеколюбче.

Стих: Ибо утверди вселенную, яже не подвижится.

Егда во гробе плотски хотя заключился еси, * Иже естеством Божества пребываяй Неописанный и Неопределенный, * смерти заключил еси сокровища * и адова вся истощил еси, Христе, царствия: * тогда и субботу сию Божественнаго благословения и славы, * и Твоя светлости сподобил еси.

Стих: Дому Твоему подобает святыня, Господи, в долготу дней.

Егда силы зряху Тя, Христе, * яко прелестника от беззаконных оклеветаемая, * ужасохуся неизглаголанному долготерпению Твоему, * и камень гроба руками запечатанный, * имиже Твоя нетленная ребра прободоша. * Обаче нашему спасению радуящеся вопияху Ти: * слава низхождению Твоему, Человеколюбче.

Слава, и ныне, глас 5:

Тебе одеющагося светом, яко ризою, * снем Иосиф с древа с Никодимом * и, видев мертва нага непогребена, * благосердный плач восприим, рыдая, глаголаше: * увы мне, Сладчайший Иисусе! * Егоже вмале солнце на Кресте висима узревшее мраком облагашеся, * и земля страхом колебашеся, * и раздирашеся церковная завеса: * но се ныне вижу Тя, мене ради волею подъемша смерть. * Како погребу Тя, Боже мой, * или какую плащаницею обвию? * Коима ли рукама прикоснуся нетленному Твоему Телу? * Или кия песни воспую Твоему исходу, Щедре? * Величаю Страсти Твоя, * песнословлю и погребение Твое со Воскресением, зовый: * Господи, слава Тебе.

Таже **Н**ыне отпущаеши: **Т**рисвятое. По Отче наш:

Тропарь, глас 2:

Благообразный Иосиф * с древа снем Пречистое Тело Твое, * плащаницею чистою обвив и вонями, * во гробе нове покрыв положи.

Другий тропарь:

Мироносицам женам * при гробе представ Ангел, вопияше: * мира мертвым суть прилична. * Христос же нетления явися чуждь.

Премудрость, и отпуст.

ПОВЕЧЕРИЕ

Поем в келлиах, на немже поем канон о распятии Господни и на плач Пресвятыя Богородицы. Ирмос по дважды, тропари на 4: последи же ирмос оба лика вкупе. Творение Симеона Логофета. Глас 6.

Песнь 1.

Ирмос: Яко по суху пешешествовав Израиль * по бездне стопами, * гонителя фараона видя потопляема. * Богу * победную песнь * поим, вопияше.

Запев: Слава Тебе, Боже наш, слава Тебе.

Обещена яко виде на Кресте, Сына и Господа, Дева Чистая, терзающися, вопияше горце, со другими женами, стеньщи, глаголаше.

Вижу Тя ныне, возлюбленное Мое Чадо и любимое, на Кресте висяща, и уязвляюся горце сердцем, рече Чистая: но даждь слово, Благий, Рабе Твоей.

Слава: Волею, Сыне Мой и Творче, терпиши на древе лютую смерть, Дева глаголаше, предстоящи у Креста со возлюбленным учеником.

И ныне: Ныне Моего чаяния, радости и веселия, Сына Моего и Господа лишена бых: увы Мне, болезную сердцем, Чистая, плачущи, глаголаше.

Песнь 3.

Ирмос: Несть свят якоже Ты, * Господи Боже мой, * вознесый рог верных Твоих, Блаже, * и утвердивый нас на камени * исповедания Твоего.

Страха ради иудейска Петр скрыся, и вси отбегоша вернии, оставльше Христа, Дева, рыдающи, глаголаше.

О страшном Твоем рождестве и странном, Сыне Мой, паче всех матерей возвеличена бых аз: но увы Мне, ныне Тя видящи на древе, распалаюся утробою.

Слава: Вижу утробу Мою на руках, в нихже Младенца держаш, с древа прияти, вещаше Чистая: но никтоже, увы Мне, сего даде.

И ныне: Се Свет Мой, сладкий, Надежда и Живот Мой Благий, Бог Мой угасе на Кресте, распалаюся утробою, Дева, стеньщи, глаголаше.

Песнь 4.

Ирмос: Христос моя сила, * Бог и Господь, * честная Церковь * боголепно поет зывающи, * от смысла чиста * о Господе празднующи.

Солнце не заходяй, Боже Превечный и Творче всех тварей Господи, како терпиши страсть на Кресте? Чистая, плачущи, глаголаше.

Плачущи, глаголаше Браконейскусная ко благообразному: потщися, Иосифе, к Пилату пристушити и испроси сняти со древа Учителя Твоего.

Слава: Видев Пречистую горце слезящу, Иосиф смутися и, плачяся, приступи к Пилату: даждь ми, вопия с плачем, Тело Бога моего.

И ныне: Уязвена Тя видящи, и без славы, нага на древе, Чадо Мое, утробою распалаюся, рыдающи яко Мати, Дева провещаваше.

Песнь 5.

Ирмос: Божиим светом Твоим, Блаже, * утренюющих Ти души * любовию озари, молюся, * Тя ведети, Слове Божий, * Истиннаго Бога, * от мрака греховнаго взывающа.

Растерзаяся и рыдая, и дивяся вкупе с Никодимом, снят Иосиф, и уцеловав Пречистое Тело, рыдаше и стеньяше, и поя Его яко Бога.

Приимши Его с плачем Мати неискусомужная, положи на колену, молящи Его со слезами и обლობызающи, горце же рыдающи и восклицающи.

Слава: Едину Надежду и Живот, Владыко, Сыне Мой и Боже, во очию свет Раба Твоя имех, ныне же лишена бых Тебе, сладкое Мое Чадо и любимое.

И ныне: Болести и скорби, и въздыхания обретоша Мя, увы Мне, Чистая, горце рыдающи, глаголаше, видящи Тя, Чадо Мое возлюбленное, нага и уединена, и вонями помазана мертвеца.

Песнь 6.

Ирмос: Житейское море, * воздвигаемое зря * напастей бурюю, * к тихому пристанищу Твоему притек, вопию Ти: * возведи от тли живот мой, * Многомилостиве.

Мертва Тя зрю, Человеколюбче, оживившаго мертвья, и содержаща вся, уязвляюся люто утробюю. Хотела бых с Тобою умерети, Пречистая глаголаше: не терплю бо без дыхания мертва Тя видети.

Дивлюся, зрящи Тя, Преплагий Боже и Прещедрый Господи, без славы, и без дыхания, и безобразна: и плачуся, держащи Тя, яко не надеяся, увы Мне, видети Тя, Сыне Мой и Боже.

Слава: Не изглаголеши ли Рабе Твоей слова, Слове Божий? Не ущедриши ли, Владыко, Тебе Рождшую? Глаголаше Чистая, рыдающи и плачущи, обლობызающи Тело Господа Своего.

И ныне: Помышляю, Владыко, яко ктому сладкаго Твоего не услышу гласа, ни доброты Лица Твоего узрю, якоже прежде Раба Твоя: ибо зашел еси, Сыне Мой, от очию Моею.

Кондак, глас 8:

Нас ради Распятаго, приидите, вси воспоим, * Того бо виде Мариа на древе и глаголаше: * аще и распятие терпиши, Ты еси Сын и Бог Мой.

Икос: Своего Агнца Агница зрящи к заколению влекома, последоваше Мариа простертыми власы со инеми женами, сия вопиющи: камо идеши, Чадо? Чесо ради скорое течение совершаеши? Еда другий брак паки есть в Кане, и тамо ныне тщишися, да от воды им вино сотвориши? Иду ли с Тобою, Чадо, или паче пожду Тебе? Дажь Ми слово, Слове, не молча мимо иди Мене, Чисту соблюдыи Мя: Ты бо еси Сын и Бог Мой.

Песнь 7.

Ирмос: Росодательну убо печь содела Ангел * преподобным отроком, * халдеи же опаляющее веление Божие, * мучителя увеща вопити: * благословен еси, Боже отец наших.

Где, Сыне Мой и Боже, благовещение древнее, еже Ми Гавриил глаголаше? Царя Тя, Сына и Бога Вышняго нарицаше: ныне же вижу Тя, Свете Мой сладкий, нага и уязвлена мертвеца.

Избавляяй болезни, ныне прими Мя с Собою, Сыне Мой и Боже, да сиду, Владыко, во ад с Тобою и Аз: не остави Мене одну, уже бо жити не терплю, не видящи Тебе сладкаго Моего Света.

Слава: С другими женами мирноносцами, рыдаючи Непорочная горце, износима видящи Христа, глаголаше: увы Мне, что вижу! Камо идеши ныне, Сыне Мой, а Мене одну оставляеши?

И ныне: Изнемогаючи и рыдаючи Непорочная, мирноносцам глаголаше: срыдайте Ми и сплачитесь горце: се бо Свет Мой сладкий и Учитель ваш гробу предается.

Песнь 8.

Ирмос: Из пламене преподобным росу источил еси * и праведнаго жертву водою попалил еси: * вся бо твориши, Христе, токмо еже хотети. * Тя превозносим во вся веки.

Деву рыдающую Иосиф виде, растерзашеся весь и вопияше горько: како Тя, о Боже мой, ныне погребу раб Твой? Какими плащаницами обвию Тело Твое?

Паче ума превзыде странное Твое видение, носящаго тварь всю Господа: сего ради Иосиф яко мертв Тя на руку своею и с Никодимом носит и погребает.

Слава: Странную вижу и преславную тайну, Дева вопияше Сыну и Господу: како в худом гробе полагаеши, мертвья повелением возставляяй во гробех?

И ныне: Ни от гроба Твоего встану, Чадо Мое, ни слезы точащи престану Раба Твоя, дондеже и Аз сиду во ад: не могу бо терпети разлучения Твоего, Сыне Мой.

Песнь 9.

Ирмос: Бога * человеком не возможно видети, * на Негоже не смеют чини Ангельстии взирати: * Тобою бо, Всечистая, * явися человеком Слово воплощено: * Егоже величающе, * с небесными вои Тя ублажаем.

Радость Мне николиже отселе прикоснется, рыдаючи, глаголаше Непорочная: Свет Мой и Радость Моя во гроб зайде: но не оставлю Его единого, где же умру и спогребуся Ему.

Душевную Мою язву ныне исцели, Чадо Мое, Пречистая вопияше слезящи: воскресни и утоли Мою болезнь и печаль, можеши бо, Владыко, елико хочещи и твориши, аще и погребл еси волею.

Слава: О како утаилася Тебе есть бездна щедрот, Матери в тайне изрече Господь? Тварь бо Мою хотя спасти, изволих умрети, но и воскресну и Тебе возвеличу, яко Бог небесе и земли.

И ныне: Воспою милосердие Твое, Человеколюбче, и поклоняюся богатству милости Твоя, Владыко: создание бо Твое хотя спасти, смерть подъял еси, рече Пречистая: но Воскресением Твоим, Спасе, помилуй всех нас.

Ирмос: Бога * человеком не возможно видети, * на Негоже не смеют чини Ангельстии взирати: * Тобою бо, Всечистая, * явися человеком Слово воплощено: * Егоже величающе, * с небесными вои Тя ублажаем.

Трисвятое. По Отче наш:

Кондак, глас 8:

Нас ради Распятого, приидите, вси воспоим. * Того бо виде Мариа на древе и глаголаше: * аще и распятие терпиши, Ты еси Сын и Бог Мой.

Господи, помилуй, 40. Таже молитва:

Иже на всякое время, и на всякий час, на Небеси и на земли, покланяемый и славимый, Христе Боже, долготерпеливе, многомилостиве, многоблагодарне, Иже праведныя любяй, и грешныя милуяй, Иже вся зовый ко спасению, обещания ради будущих благ. Сам Господи прими и наша в час сей молитвы, и исправи живот наш к заповедем Твоим: души наша освяти, тела очисти: помышления исправи, мысли очисти: и избави нас от всякия скорби, зол и болезней: огради нас святыми Твоими ангелы, да ополчением их соблюдаем, и наставляем, достигнем в соединение веры, и в разум неприступныя Твоя славы, яко благословен еси во веки веков, аминь.

Таже, Господи, помилуй, трижды.

Слава, и ныне: Честнейшую херувим:

Именем Господним благослови, отче:

Священник: Молитвами святых отец наших:

Нескверная, Неблазная, Нетленная, Пречистая, Чистая Дево, Богоневесто Владычице, Яже Бога Слова человеком преславным Твоим Рождеством соединившая, и отринувшееся естество рода нашего небесным совокупльшая, яже ненадежных едина Надежда, и боримых Помоще, готовое Заступление к Тебе притекающих, и всех христиан Прибежище: не гнушайся мене грешнаго, сквернаго, скверными помыслы, и словесы, и деяньми всего себе непотребна сотворша, и разумом лености сластей жития раба бывша. Но яко Человеколюбиваго Бога Мати, человеколюбне умилосердися о мне грешнем и блуднем, и прими мое еже от скверных устен приносимое Тебе моление: и Твоего Сына, и нашего Владыку и Господа, матернее Твое дерзновение употребляющи, моли, да отверзет и мне человеколюбныя утробы Свояя благодати, и презрев моя безчисленная прегрешения, обратит мя к покаянию, и Своих заповедей делателя искусна явит мя. И предстани мне присно, яко Милостивая, и Милосердая, и Благолюбивая, в настоящем убо житии теплая Предстательнице и Помощнице, сопротивных нашествия отгоняющи, и ко спасению наставляющи мя: и во время исхода моего окаянную мою душу соблюдающи, и темныя зраки лукавых бесов далече от нея отгоняющи. в страшный же день суда вечныя мя избавляющи муки и неизреченныя славы Твоего Сына и Бога нашего наследника мя показующи: Юже и да улучу, Владычице моя, Пресвятая Богородице, Твоим ходатайством и заступлением, благодатию и человеколюбием Единороднаго Сына Твоего, Господа и Бога и Спаса нашего Иисуса Христа: Емуже подобает всякая слава, честь и поклонение, со Безначальным Его Отцем, и Пресвятым и Благим и Животворящим Его Духом, ныне и присно, и во веки веков, аминь.

И даждь нам, Владыко, на сон грядущим, покой тела и души, и сохрани нас от мрачного сна греховного, и от всякого темного и ноцного сладострастия. Укроти стремления страстей, угаси разжженные стрелы лукаваго, яже на ны льстивно движимья. Плоти наша востания утоли, и всякое земное и вещественное наше мудрование успи. И даруй нам, Боже, бодр ум, целомудр помысл, сердце трезвящееся, сон легок, и всякого сатанина мечтания изменен. Возстави же нас во время молитвы утверждены в заповедех Твоих, и память судеб Твоих в себе твердо имуща: всенощное славословие нам даруй, во еже пети и благословити и славити пречестное и великолепое имя Твое, Отца, и Сына, и Святаго Духа, ныне и присно, и во веки веков, аминь.

Преславная Приснодево, Мати Христа Бога, принеси нашу молитву Сыну Твоему и Богу нашему, да спасет Тобою души наша.

Упование мое Отец, Прибежище мое Сын, Покров мой Дух Святыи: Троице Святая, слава Тебе.

Слава, и ныне: Господи помилуй (3). Господи, благослови.

Господи Иисусе Христе Сыне Божий, молитв ради Пречистыя Твоея Матере и всех ради святых, помилуй и спаси нас, яко Благ и Человеколюбец. **Аминь.**

И поклонився до земли, глаголи прощение сие:

Ослаби, остави, прости, Боже, прегрешения наша, вольная и невольная, яже в слове и в деле, яже в ведении и не в ведении, яже во дни и в ноци, яже во уме и в помышлении: вся нам прости, яко Благ и Человеколюбец.

И востав, глаголи молитву:

Ненавидящих и обидящих нас прости, Господи Человеколюбче. Благотворящим благосотвори. Братиям и сродником нашим даруй яже ко спасению прощения и жизнь вечную. В немощех сущия посети и исцеление даруй. Иже на мори управи. Путешествующим спутешествуй. Служащим и милующим нас грехов оставление даруй. Заповедовавших нам недостойным молиться о них помилуй по велицей Твоей милости. Помяни, Господи, братьий наших плененных и избави я от всякого обстояния. Помяни, Господи, плодоносящих и доброделающих во святых Твоих церквах, и даждь им яже ко спасению прощения и жизнь вечную. Помяни, Господи, и нас, смиренных и грешных и недостойных раб Твоих, и просвети наш ум светом разума Твоего, и настави нас на стезю заповедей Твоих, молитвами Пречистыя Владычицы наша Богородицы и Приснодевы Марии и всех Твоих святых: яко благословен еси во веки веков. **Аминь.**

И отпуст. Полунощницу же поем в келлиах.

ВО СВЯТУЮ И ВЕЛИКУЮ СУББОТУ

Клеплет ко Утрени в седмый час ноци. Начинаем Утрению по обычаю. И по шестопсалмни ектенна великая.

На Бог Господь: тропарь, глас 2:

Благообразный Иосиф * с древа снем Пречистое Тело Твое, * плащаницею чистою обвив * и благоуханьми, * во гробе нове покрыв положи.

Слава: Егда снизшел еси к смерти, * Животе безсмертный, * тогда ад умертвил еси блистанием Божества: * егда же и умершия от преисподних воскресил еси, * вся силы небесныя взываху: * Жизнодавче Христе Боже наш, слава Тебе.

И ныне: Мирносицам женам, при гробе представ, Ангел вопияше: мира мертвым суть прилична, Христос же истления явился чуждъ.

И, кадящу священнику весь храм, начинаем пети Непорочны со сладкопением: такожде по коемуждо стисе и похвалы.

Статья Первая.

Возглашает певец, во глас 5:

Благословен еси, Господи, * научи мя оправданием Твоим.

1. Блажени непорочнии в путь, * ходящии в законе Господни.

И похвалы, во глас 5:

Жизнь во гробе положил еси, Христе, * и Ангельская воинства ужасахуся, * снизхождение славяще Твое.

2. Блажени испытующии свидения Его, всем сердцем взыщут Его.

Жизнь, како умираеши? Како и во гробе обитаеши, смерти же царство разрушаеши и от ада мертвыя возставляеши?

3. Не делающии бо беззакония в путех Его ходиша.

Величаем Тя, Иисусе Царю, и чтим погребение и страдания Твоя, имиже спас еси нас от истления.

4. Ты заповедал еси заповеди Твоя сохранить зело.

Меры земли положивый, в мале гробе обитаеши днесь, Иисусе Всецарю, от гробов мертвыя возставляй.

5. Дабы исправилися путие мои сохранить оправдания Твоя.

Иисусе, Христе мой, Царю всех, что ища к сущим во аде пришел еси? Или род свободити человеческий?

6. Тогда не постыжуся, внегда призрети ми на вся заповеди Твоя.

Владыка всех зрится мертв, и во гробе нове полагается истощивый гробы мертвых.

7. Исповемся Тебе в правости сердца, внегда научити ми ся судьбам правды Твоя.

Жизнь во гробе положен был еси, Христе, и смертию Твоею смерть погубил еси, и источил еси миру жизнь.

8. **Оправдания Твоя сохраню, не остави мене до зела.**

Со злодеи яко злодей, Христе, вменен был еси, оправдал нас всех от злодейства древняго зачинателя.

9. **В чесом исправит юнейший путь свой? Внегда сохранити словеса Твоя.**

Красный добротою паче всех человек, яко беззрачен мертв является, естество красивый всех.

10. **Всем сердцем моим взысках Тебе, не отрини мене от заповедей Твоих.**

Ад како стерпит, Спасе, пришествие Твое, а не паче сокрушится омрачаемь, блистания света Твоего лучами ослеплен?

11. **В сердце моем скрых словеса Твоя, яко да не согрешу Тебе.**

Исусе, сладкий мой и спасительный Свете, како во гробе темнем скрылся еси? О несказанного и неизреченного терпения!

12. **Благословен еси, Господи, научи мя оправданием Твоим.**

Недоумеваеи и естество умное, и множество безплотное, Христе, о таинстве несказанного и неизреченного Твоего погребения.

13. **Устнама моима возвестих вся судьбы уст Твоих.**

О чудес странных! О вещей новых! Дыхания моего Податель бездыханен носится, погребаемь руками Иосифовыма.

14. **На пути свидений Твоих насладихся, яко о всяком богатстве.**

И во гроб зашел еси, Христе, и недр Отческих никакоже отлучился еси: сие есть и странно и преславно вкупе.

15. **В заповедех Твоих поглумлюся и уразумею пути Твоя.**

Истинный небесе и земли Царь, аще и во гробе малейшем заключен был еси, познался еси всей твари, Исусе.

16. **Во оправданиях Твоих поучуся, не забуду словес Твоих.**

Тебе положену во гробе, Создателю Христе, адова основания подвигошася, и гроби человекотверзошася.

17. **Воздаждь рабу Твоему, живи мя, и сохраню словеса Твоя.**

Землю содержай горстию, умерщвлен плотию, под землею ныне заключается, мертвья избавляя от адова заключения.

18. **Открый очи мои, и уразумею чудеса от закона Твоего.**

Из истления возшел еси, Жизнь, Спасе мой, умерый и к мертвым пришедый, и сломивый адовы заклёпы.

19. **Пришлец аз сьмь на земли, не скрый от мене заповеди Твоя.**

Якоже света светильник, ныне плоть Божия под землею яко под спуд крыется и отгоняет сущую во аде тьму.

20. **Возлюби, душа моя, возжелати судьбы Твоя на всякое время.**

Невещественных воинств множество стекается со Иосифом и Никодимом погребсти во гробе мале Тя, Невместимаго.

21. **Запретил еси гордым, прокляти уклоняющиеся от заповедей Твоих.**

Умерщвлен волею и положен под землю, жизни источниче, Иисусе мой, оживил еси мя умерщвлена преступлением горьким.

22. **Отыми от мене поношение и уничижение, яко свидений Твоих взысках.**

Изменяшеся вся тварь страстию Твоею: вся бо Тебе, Слове, сострадаху, ведуща Тя Содержителя всех.

23. **Ибо седоша князи и на мя клеветаху: раб же Твой глумяшеся во оправданиях Твоих.**

Жизни камень во чрево прием, ад всеядец изверже мертвья, яже от века поглотит.

24. **Ибо свидения Твоя поучение мое есть, и совети мои оправдания Твоя.**

Во гробе нове положился еси, Христе, и естество человеческое обновил еси, воскрес боголепно из мертвых.

25. **Прильпе земли душа моя: живи мя по словеси Твоему.**

На землю спел еси, да спасеши Адама: и на земли не обрет сего, Владыко, даже до ада снизшел еси ища.

26. **Пути моя возвестих, и услышал мя еси, научи мя оправданием Твоим.**

Сотрясается страхом, Слове, вся земля, и носило света лучи скры, величайшему Твоему Свету сокровену бывшу в земли.

27. **Путь оправданий Твоих вразуми ми, и поглумлюся в чудесех Твоих.**

Яко человек убо умираеши волею, Спасе, яко Бог же смертныя возставил еси от гробов и глубины греховныя.

28. **Воздрема душа моя от уныния: утверди мя в словесех Твоих.**

Слезоточная рыдания на Тебе матерски, о Иисусе, накрапляющи, Чистая вопияше: како погребу Тя, Сыне?

29. **Путь неправды отстави от мене и законом Твоим помилуй мя.**

Якоже пшеничное зерно, зашед в недра земная, изобильный воздал еси клас, возставив человеки, сущия от Адама.

30. **Путь истины изволих и судьбы Твоя не забых.**

Под землю скрылся еси, якоже солнце ныне, и нощию смерти покровен был еси: но возсияй светлейше, Спасе.

31. **Прилепихся свидением Твоим, Господи, не посрами мене.**

Якоже солнечный круг луна сокрывает, и Тебе, Спасе, ныне гроб скры, скончавшагося смертию плотски.

32. **Путь заповедей Твоих текох, егда расширил еси сердце мое.**

Жизнь смерти вкусившая, Христос от смерти смертныя свободи и всем ныне дарует жизнь.

33. **Законоположи мне, Господи, путь оправданий Твоих и взыщу и выну.**

Умерщвлена древле завистно Адама возводиши к жизни умерщвлением Твоим, Спасе, во плоти явився Новый Адам.

34. Вразуми мя, и испытаю закон Твой, и сохраню и всем сердцем моим.

Невещественнии чини, простерта мертва Тя зряще нас ради, ужасохуся, покрывающесе крылы, Спасе.

35. Настави мя на стезю заповедей Твоих, яко тую восхотех.

Снем Тя, Слове, от древа мертва, во гробе Иосиф ныне положи: но востани, спасая вся, яко Бог.

36. Приклони сердце мое во свидения Твоя, а не в лихоимство.

Ангелом радость быв, Спасе, ныне и печали сим был еси виновен, видимь плотию бездыханен мертв.

37. Отврати очи мои, еже не видети суеты: в пути Твоем живи мя.

Вознесен на древо, и живуция человеки совозносиши: под землею же быв, лежащая под нею воскрешаеши.

38. Постави рабу Твоему слово Твое в страх Твой.

Якоже лев уснув плотию, Спасе, яко некий скимен млад возраеши, отложив старость плотскую.

39. Отыми поношение мое, еже непщевах: яко судьбы Твоя благи.

В ребра прободен был еси, ребро вземый Адамле, от негоже Еву создал еси, и источил еси токи очистительныя.

40. Се возжелал заповеди Твоя: в правде Твоей живи мя.

Тайно убо древле закалается агнец: Ты же, яве заклан быв, Незлобиве, всю тварь очистил еси, Спасе.

41. И да придет на мя милость твоя, Господи, спасение Твое по словеси Твоему.

Кто изречет образ страшный воистинну новый? Владычествуй бо тварию днесь страсть приемлет и умирает нас ради.

42. И отвечаю поношающим ми слово, яко уповах на словеса Твоя.

Жизни Хранитель како зрится мертв? Ужасающесе Ангели взываху: како же во гробе заключается Бог?

43. И не отыми от уст моих словесе истинна до зела: яко на судьбы Твоя уповах.

Из ребра Твоего, копием прободеннаго, Спасе, жизнь искапаеши жизни (Еве), от жизни изгнавшей мя, живиши мя с нею.

44. И сохраню закон Твой выну, в век и в век века.

Распростерт на древе, собрал еси человеки: в ребра же Твоя животочная прободен, всем оставление источаеши, Иисусе.

45. И хождах в широте, яко заповеди Твоя взысках.

Благообразный, Спасе, образует страшно и погрешает Тя яко мертва благообразно, и ужасается Твоего образа страшнаго.

46. И глаголах о свидениях Твоих пред цари и не стыдяхся.

Под землю хотением низшед яко смертен, возводиши от земли к небесным отгуду низпадшия, Иисусе.

47. **И** поучахся в заповедех Твоих, яже возлюбих зело.

Аще и мертв виден был еси, но живой яко Бог, возводиши от земли к небесным оттуду низпадшия, Иисусе.

48. **И** воздвигох рuce мои к заповедем Твоим, яже возлюбих.

Аще и мертв виден был еси, но, живой яко Бог, умерщвленные человеки оживил еси, моего умертвив умертвителя.

49. **И** глумляхся во оправданиях Твоих.

О радости оныя! О многия сладости! Еяже сущих во аде наполнил еси, во глубинах мрачных Свет возсияв.

50. **Помяни** словеса Твоя рабу Твоему, ихже упование дал ми еси.

Покланяюся страсти, воспеваю погребение, величаю Твою державу, Человеколюбче, имиже свободихся от страстей тлетворных.

51. **То** мя утеши во смиренни моем, яко слово Твое живи мя.

На Тя меч обнажашеся, Христе: и меч крепкаго убо притупляется, меч же едемский обращается.

52. **Горди** законопреступоваху до зела: от закона же Твоего не уклонихся.

Агница, зряци Агница в заколении острием прободаема, рыдаше, сподвизающи и стадо вопити.

53. **Помянух** судьбы Твоя от века, Господи, и утешихся.

Аще и во гробе погребаешися, аще и во ад идеши, Спасе, но и гробы истоцил еси, и ад обнажил еси, Христе.

54. **Печаль** прият мя от грешник, оставляющих закон Твой.

Волею низшед под землю, Спасе, умерщвленные человеки оживил еси и возвел еси во славе Отчей.

55. **Петя** бяху мне оправдания Твоя на месте пришельствия моего.

От Троицы Един поносительную смерть во плоти нас ради претерпе: ужасается солнце, и трепещет земля.

56. **Помянух** в нощи имя Твое, Господи, и сохраних закон Твой.

Яко от источника горькаго, от Иудова колена исчадия в рове положиша Питателя маннодавца Иисуса.

57. **Сей** бысть мне, яко оправданий Твоих взысках.

Судия яко судимь пред Пилатом судиею и предста, и на смерть неправедную на древе крестнем осужден бысть.

58. **Часть** моя еси, Господи, рех сохранить закон Твой.

Гордый Израилю, убийственнии людие! Что пострадавшие, Варавву свободисте, Спаса же предасте кресту?

59. **Помолихся** Лицу Твоему всем сердцем моим: помилуй мя по словеси Твоему.

Рукою Твоею создавый Адама от земли, того ради естеством был еси Человек, и распялся еси волею Твоею.

60. **Помыслих пути Твоя и возвратих нозе мои во свидения Твоя.**

Послушав, Слове, Отца Твоего, даже до ада лютаго сошел еси и воскресил еси род человеческий.

61. **Уготовихся и не смутихся, сохранить заповеди Твоя.**

Увы Мне, Свете мира! Увы Мне, свете Мой, Иисусе Мой возжеленный! Вопияше Дева, рыдаючи горько.

62. **Ужа грешник обязался мне, и закона Твоего не забых.**

Завистливии, убийственнии и гордии людие! Поне плащаницы и сударя самага постыдитесь, воскресшу Христу.

63. **Полунощи востах исповедатися Тебе о судьбах правды Твоея.**

Прииди убо, скверный убийце учениче, и нрав злобы твоя покажи ми, имже был еси предатель Христов.

64. **Причастник аз есмь всем боящимся Тебе и хранящим заповеди Твоя.**

Яко человеколюбив некто притворяешися, буе и слепа, всегубительнейше, неверне, Мирю продавый на цене.

65. **Милости Твоя, Господи, исполнь земля: оправданием Твоим научи мя.**

Небеснаго Мира кую цену стяжал еси? За Многоценнаго что приял еси равноценное? Неистовство обрел еси, проклятейший сатано.

66. **Благость сотворил еси с рабом Твоим, Господи, по словеси Твоему.**

Аще нищелюбец еси и о мире печалуеши, истощаемем во очищение души, како за злато продаеши Светозарнаго?

67. **Благости и наказанию и разуму научи мя, яко заповедем Твоим веровах.**

О Боже и Слове! О радость Моя! Какое претерплю тридневное Твое погребение? Ныне терзаюся утробой матерски.

68. **Прежде даже не смирити ми ся, аз прегреших: сего ради слово Твое сохраних.**

Кто даст Ми воду и слез источники, да оплачу сладкаго Моего Иисуса? Богоневестная Дева вzywаше.

69. **Благ еси Ты, Господи, и благостию Твоею научи мя оправданием Твоим.**

О горы и холми, и человеков множества, восплачитесь, и вся рыдайте со Мною, Бога нашего Материю!

70. **Умножися на мя неправда гордых, аз же всем сердцем моим испытаю заповеди Твоя.**

Когда увижу Тя, Спасе, безлетнаго Света, радость и сладость сердца Моего? Дева горько вопияше.

71. **Усырися, яко млеко, сердце их, аз же закону Твоему поучихся.**

Аще и яко камень краесекомый, Спасе, Ты приял еси сечение, но источил еси живую струю, яко Источник сый жизни.

72. Благо мне, яко смирил мя еси, яко да научуся оправданием Твоим.

Яко от источника единого, от ребра Твоего, сугубую реку изливающего, напаяеми, бессмертную приобретаем жизнь.

73. Благ мне закон уст Твоих, паче тысяч злата и сребра.

Волею явился еси, Слове, во гробе мертв: но живещи, и человеки Воскресением Твоим, Спасе мой, воздвигнеши, якоже предрекл еси.

Слава: Воспеваем, Слове, Тебе всех Бога со Отцем и Святым Твоим Духом, и славим Божественное Твое погребение.

И ныне, Богородичен: Ублажаем Тя, Богородице Чистая, и почитаем тридневное погребение Сына Твоего и Бога нашего верно.

И паки первый припев оба лика вкупе.

Жизнь во гробе положился еси, Христе, * и Ангельская воинства ужасохся, * снисхождение славяще Твое.

Таже ектения малая.

И возглас на первую статию: Яко благословися Твое имя, и прославися Твое Царство, Отца, и Сына, и Святаго Духа, ныне и присно, и во веки веков.

И, покадившу священнику, начинаем вторую статию.

Статья Вторая.

Начинает левый лик благочинно тропарь, во глас 5:

Достойно есть величати Тя, Жизнодавца, * на Кресте руце простершаго * и сокрушившаго державу вражию.

74. Руце Твои сотвориште мя и создасте мя: вразуми мя, и научуся заповедем Твоим.

Достойно есть величати Тя, всех Зиждителя: Твоими бо страданьми имамы безстрастие, избавльшеся от тления.

75. Боящися Тебе узрят мя и возвеселятся, яко на словеса Твоя уповах.

Ужасеся земля, Спасе, и солнце скрыся, Тебе, Невечернему Свету, Христе, зашедшу во гробе плотски.

76. Разумех, Господи, яко правда судьбы Твоя, и воистинну смирил мя еси.

Уснул еси, Христе, жизноподательным сном во гробе и от тяжкаго сна греховнаго воздвигл еси род человеческий.

77. Буди же милость Твоя, да утешит мя, по словеси Твоему рабу Твоему.

Едина от жен без болезней родих Тя, Чадо, ныне же терплю Страстию Твоею болезни нестерпимыя: глаголаше Чистая.

78. Да приидут мне щедроты Твоя, и жив буду, яко закон Твой поучение мое есть.

Горе Тя, Спасе, неразлучно со Отцем суща, долу же мертва простерта на земли зряще, ужасаются Серафими.

79. Да постыдятся горди, яко неправедно беззаконноваша на мя: аз же* поглумлюся в заповедех Твоих.

Раздирается церковная завеса Твоим распятием, Слове: сокрывают светила свет, Тебе, Солнцу, скрывшуся под землю.

80. Да обратят мя боящиеся Тебе и ведящие свидения Твоя.

Земли круг изначала едином манием водрузивый бездыханен, яко человек зайде под землю: ужаснися видением, небо.

81. Буди сердце мое непорочно во оправданиях Твоих, яко да не постыжуся.

Зашел еси под землю, рукою Твоею создавый человека, да воздвигнеши от падения соборы человеческия всеильною державою.

82. Исчезает во спасение Твое душа моя, на словеса Твоя уповах.

Плач священный, приидите, воспоим Христу умершему, яко древле жены мироносицы, да и радуйся услышим с ними.

83. Исчезоша очи мои в слово Твое, глаголюще: когда утешиши мя?

Миро воистинну неистоимое еси Ты, Слове: темже Ти и миро приношаху, яко мертву Живому, жены мироносицы.

84. Зане бых яко мех на слане: оправданий Твоих не забых.

Погребен убо, Христе, адова царствия сокрушаеши, смертию же смерть умерщвляеши и от тления освобождаети земнородныя.

85. Колика есть дней раба Твоего? Когда сотвориши ми от гонящих мя суд?

Токи жизни проливающая Божия Премудрость, во гроб зашедши, оживотворяет сущия в неприступных адовых местех.

86. Поведаша мне законопреступницы глумления, но не яко закон Твой, Господи.

Да обновлю человеческое сокрушенное естество, волею уязвлен есть смертию плотски: темже, Мати Моя, не терзайся рыданьми.

87. Вся заповеди Твоя истина: неправедно погнаша мя, помози ми.

Зашел еси под землю, Светило правды, и мертвыя якоже от сна воздвигл еси, отгнав всякую тьму, сущую во аде.

88. Вмале не скончаша мене на земли: аз же не оставих заповедей Твоих.

Зерно двоерасленное жизнеспособное в недра земли сеется со слезами днесь: но, прозябнув, мир обрадует.

89. По милости Твоей живи мя: и сохраню свидения уст Твоих.

Убояся Адам Бога ходяща в рай, радуется же во ад сошедшу, падый прежде, и ныне воздвигаемь.

90. Во век, Господи, слово Твое пребывает на небеси.

Лиет Тебе возлияния слезная, плотию положену во гробе, Рождшая Тя, Христе, вопиющи: востани, Чадо, якоже предрекл еси.

91. В род и род истина Твоя: основал еси землю, и пребывает.

Во гробе нове благоговейно Тя сокрывая, Иосиф песни исходныя боголепныя, смешенныя с рыданьми, поет Тебе, Спасе.

92. Учинением Твоим пребывает день, яко всяческая работна Тебе.

Гвоздьми Тя ко Кресту пригвождена узревши, Мати Твоя, Слове, гвоздьми и стрелами печали горькия пронзается душею.

93. Яко аще бы не закон Твой поучение мое был, тогда убо погибл бых во смиреннии моем.

Зрящи Тя, всех сладость, питием напаяемого горьким, Мати слезами лице орошает горце.

94. Во век не забуду оправданий Твоих, яко в них оживил мя еси.

Уязвляюся люте и терзаюся утробою, Слове, зрящи неправедное Твое закование, глаголаше Пречистая с плачем.

95. Твой есмь аз, спаси мя, яко оправданий Твоих взысках.

Око сладкое и устне Твои како закрою, Слове? Како же Тя аки мертвеца погребу? Ужасаяся, вопияше Иосиф.

96. Мене ждаша грешницы погубити мя: свидения Твоя разумех.

Песни надгробныя Иосиф и Никодим поют Христу умершему ныне: поют же с ними и Серафими.

97. Всякия кончины видех конец: широка заповедь Твоя зело.

Заходиши под землю, Спасе, Солнце правды: темже Рождающая Тя луна от печалей затмевается, вида Твоего лишаема.

98. Коль возлюбих закон Твой, Господи! Весь день поучение мое есть.

Ужасеся ад, Спасе, зря Тя, Жизнодавца, богатство онаго расхищающа и сущия от века мертвыя возстающа.

99. Паче враг моих умудрил мя еси заповедию Твоею, яко в век моя есть.

Солнце свет возсиявает по нощи, Слове: и Ты, воскрес, просияй по смерти ясно, яко от чертога.

100. Паче всех учащих мя разумех, яко свидения Твоя поучение мое есть.

Земля Тя, Создателю, в недра приемши, трепетом содержиима, Спасе, трясется, возбудивши мертвыя трясением.

101. Паче старец разумех, яко заповеди Твоя взысках.

Миром Тя, Христе, ныне новолепно помазавше, Никодим и Благообразный вопияху: ужаснися, вся земле!

102. От всякаго пути лукава возбранных ногам моим, яко да сохраню словеса Твоя.

Зашел еси, Светотворче, и с Тобою зайде свет солнца: трепетом же тварь содержится, Тя проповедающе всех Творца.

103. От судеб Твоих не уклонихся, яко Ты законоположил ми еси.

Камень углаженный покрывает краеугольный камень: человек же смертный, яко смертна, Бога сокрывает ныне во гробе. Ужаснися, земле!

104. Коль сладка гортани моему словеса Твоя! Паче меда устом моим.

Виждь ученика, егоже любил еси, и Твою Матерь, Чадо, и вещание даждь сладчайшее: взываше, плачущи, Чистая.

105. От заповедей Твоих разумех: сего ради возненавидех всяк путь неправды.

Ты, Слове, яко сый жизни Податель, на Кресте прострыйся, иудеев не умертвил еси, но воскресил еси и сих мертвыя.

106. Свотильник ногама моима закон Твой и свет стезям моим.

Доброты прежде не имел еси, Слове, ниже вида, егда страдал еси: но воскрес превозсиял еси, украсив человеки Божественными зарями.

107. Кляхся и поставих сохранить судьбы правды Твоея.

Зашел еси плотию в землю, Невечерняя Деннице, и не терпя зрети солнце померче полудни сущу.

108. Смирися до зела: Господи, живи мя по словеси Твоему.

Солнце и луна вкупе померкша, Спасе, рабом благоразумным подражаху, иже в черныя одежды облачаются.

109. Вольная уст моих благоволи же, Господи, и судьбам Твоим научи мя.

Позна Тя Бога сотник, аще и умертвился еси: како убо Тя, Боже мой, осяжу рукама? Ужасаяся, вопияше Иосиф.

110. Душа моя в руку Твоею выну, и закона Твоего не забых.

Усну Адам, но смерть из ребра изводит: Ты же, ныне уснув, Слове Божий, источаеши от ребр Твоих миру жизнь.

111. Положиша грешницы сеть мне, и от заповедей Твоих не заблудих.

Уснул еси мало и оживил еси умершия, и, воскрес, воскресил еси спящия от века, Блаже.

112. Наследовах свидения Твоя во век, яко радование сердца моего суть.

Взят еси от земли, но источил еси спасения вино, животочная Лозо: прославляю Страсть и Крест.

113. Приклоних сердце мое сотворити оправдания Твоя в век за воздаяние.

Како невестественнии чиновачальницы, зряще Тя, Спасе, нага, окровавлена, осуждена, терпяху дерзость распинателей?

114. Законопреступныя возненавидех, закон же Твой возлюбих.

Лукавый, стропотнейший роде еврейский! Ведал еси воздвижение храма: почто осудил еси Христа?

115. Помощник мой и Заступник мой еси Ты: на словеса Твоя уповах.

Во одежду поругания Украсителя всех облакаеши, Иже небо озвезди и землю украси чудно.

116. Уклонитесь от мене, лукавнующи, и испытаю заповеди Бога моего.

Якоже птица неясуть, уязвлен в ребра Твоя, Слове, дети Твоя умершия оживил еси, искапав им животворныя токи.

117. Заступи мя по словеси Твоему и жив буду: и не посрами мене от чаяния моего.

Солнце древле устави Иисус, иноплеменники секий: Ты же скрылся еси, низлагая тьмы начальника.

118. Помози ми, и спасуся, и поучуся во оправданиях Твоих выну.

От недр Отеческих неисходен пребыв, Щедре, и Человек быти благоволил еси, и во ад снизшел еси, Христе.

119. Уничжил еси вся отступающия от оправданий Твоих: яко неправедно помышление их.

Вознесен бысть распныйся, землю на водах повесивый, и яко бездыханен в ней ныне возлегает: еже не терпящи трясаешься люто.

120. Преступающия непщевах вся грешныя земли: сего ради возлюбих свидения Твоя.

Увы мне, о Сыне! Неискусомужная, рыдающа, глаголаше: на Негоже бо яко на Царя надеяся, осуждена зрю ныне на Кресте.

121. Пригвозди страху Твоему плоти моя: от судеб бо Твоих убояхся.

Сия Гавриил Мне возвести, егда слете, иже рече о Царстве вечном Сына Моего Иисуса.

122. Сотворих суд и правду: не предаждь мене обидящим мя.

Увы, Симеоново совершился пророчество: Твой бо меч пройде сердце Мое, Еммануиле.

123. Восприими раба Твоего во благо, да не оклеветают мене горди.

Поне сущих от мертвых постыдитесь, о иудее! Ихже возстави Жизнодавец, Егоже вы убисте завистно.

124. Очи мои исчезосте во спасение Твое и в слово правды Твоея.

Ужасеся солнце, видев Тебе, невидимый Свете, Христе мой, во гробе сокрываема и бездыханна, и помрачи свой свет.

125. Сотвори с рабом Твоим по милости Твоей и оправданием Твоим научи мя.

Плакаше горько Пренепорочная Мати Твоя, Слове, егда во гробе виде Тебе, Неизреченнаго и Безначальнаго Бога.

126. Раб Твой есмь аз: вразуми мя, и увем свидения Твоя.

Мертвость Твою, Христе, зрящи, нетленная Мати Твоя горько к Тебе вещаше: не косни, Жизнь, в мертвых.

127. Время сотворити Господеви: разориша закон Твой.

Ад лютый вострепета, егда Тя виде, Солнце Славы, Безсмертне, и издаваше узники со тщанием.

128. Сего ради возлюбих заповеди Твоя паче злата и топазиа.

Велие и ужасное видение ныне зрится: жизни бо Виновник волею смерть подъят, оживити хотя всех.

129. Сего ради ко всем заповедем Твоим направляхся, всяк путь неправды возненавидех.

Прободаешися в ребра и пригвождаешися в руце Ты, Владыка, язву от ребра и невоздержание рук праотец исцеляя.

130. Дивна свидения Твоя: сего ради испытана я душа моя.

Прежде о Рахилине сыне плакася всяк в дому: ныне о Сыне Девы рыдаша ученик лик с Материю.

131. Явление словес Твоих просвещает и вразумляет младенцы.

Ударение рук даша по ланите Христу, рукою человека создавшему и зубы зверя сокрушившему.

132. Уста моя отверзох и привлекох дух, яко заповедей Твоих желлах.

Песньми Твое, Христе, распятие и погребение ныне вси вернии празднуем, избавльшися от смерти погребением Твоим.

Слава, Троицен: Безначальне Боже, Соприсносущне Слове и Душе Святей! Укрепи рог православных людей, яко Благ.

И ныне, Богородичен: Жизнь рождающая, Пренепорочная Чистая Дево, утоли церковныя соблазны и подаждь мир, яко Благая.

И паки первый тропарь оба лика.

Достойно есть величати Тя, Жизнодавца, * на Кресте руце простершаго * и сокрушившаго державу вражию.

Таже ектенна малая.

Возглас: Яко Свят еси, Боже наш, на престоле славы Херувимстем почиваяй, и Тебе славу возсылаем, со Безначальным Твоим Отцем, и с Пресвятым и Благим и Животворящим Твоим Духом, ныне и присно и во веки веков.

И начинаем третью статию, кадящу священнику.

Статья третья.

Начинает паки со сладкопением десный, сиречь первый лик, на глас 3-й:

Роди вси песнь погребению Твоему * приносят, Христе мой.

133. Призри на мя и помилуй мя, по суду любящих имя Твое.

Снем с древа, плащаницею обвив, Аримафей во гробе Тя погребают.

134. Стопы моя направи по словеси Твоему, и да не обладает мною всякое беззаконие.

Мироносицы приидоша, миро Тебе, Христе мой, носяща премудро.

135. Избави мя от клеветы человеческия, и сохранию заповеди Твоя.

Гряди, вся тварь, песни исходныя принесем Зиждителю.

136. Лице Твое просвети на раба Твоего, и научи мя оправданием Твоим.

Яко мертва Живаго с мироносицами вси миропомажем мудренно.

137. Исходища водная изведосте очи мои, понеже не сохраних закона Твоего.

Иосифе треблаженне, погребѣ тело Христа Жизнодавца.

138. Праведен еси, Господи, и прави суди Твои.

Ихже напитана манною, тии подвигоша пята на Благодетеля.

139. Заповедал еси правду свидения Твоя и истину зело.

Ихже напитана манною, тии приносят Спасу желчь купно и оцет.

140. Истаяла мя есть ревность Твоя: яко забыша словеса Твоя врази мои.

О пребезумия и христуубийства пророкоубийц!

141. Разжженно слово Твое зело, и раб Твой возлюбие.

Якоже безумный служитель, предаде ученик бездну премудрости.

142. Юнейший аз есмь и уничижен: оправданий Твоих не забых.

Избавителя продав, пленник явися льстивый Иуда.

143. Правда Твоя правда во век, и закон Твой истина.

По Соломону, ров глубокий уста еврей беззаконных.

144. Скорби и нужды обретоша мя: заповеди Твоя поучение мое.

В стропотных шествиих еврей беззаконных волчцы и сети.

145. Правда свидения Твоя в век: вразуми мя, и жив буду.

Иосиф погребает с Никодимом, аки мертвеца, Зиждителя.

146. Возвах всем сердцем моим: услыши мя, Господи: оправдания Твоя взыщу.

Жизнодавче Спасе, слава державе Твоей, ад разорившей.

147. Возвах Ти: спаси мя, и сохраню свидения Твоя.

Лежаща Тя, Слове, видящи, Пречистая матерски плакаше.

148. Предварих в безгодии, и возвах, на словеса Твоя уповах.

О сладкая Моя весно, Сладчайшее Мое Чадо! Где Твоя зайде доброта?

149. Предваристе очи мои ко утру, поучитися словесем Твоим.

Плач сподвизаше Всечистая Твоя Мати Тебе, Слове, умершу.

150. Глас мой услыши, Господи, по милости Твоей: по судьбе Твоей живи мя.

Жены с миром приидоша помазати Христа Божественнаго мира.

151. Приближишася гонящии мя беззаконием, от закона же Твоего удалишася.

Смерть смертию Ты умерщвляеши, Боже мой, Божественною силою Твоею.

152. Близ еси Ты, Господи, и вси путие Твои истина.

Прельстися прелестник, прельстивыйся же избавляется премудростию Твоею, Боже мой.

153. Исперва познах от свидений Твоих, яко в век основал я еси.

Во дно адово низведен бысть предатель, в кладенец истления.

154. Виждь смирение мое, и изми мя: яко закона Твоего не забудь.

Волчцы и сети путие треокаяннаго безумнаго Иуды.

155. Суди суд мой, и избави мя: словесе ради Твоего живи мя.

Вси погибнут вкупе распинатели Твои, Слове, Сыне Божий Всецарю.

156. Далече от грешник спасение, яко оправданий Твоих не взыскаша.

В кладенце истления вси погибнут вкупе мужие кровей.

157. Щедроты Твоя многи, Господи: по судьбе Твоей живи мя.

Сыне Божий Всецарю, Боже мой, Создателю мой, како страсть подъял еси?

158. Мнози изгонящии мя и стужающии ми: от свидений Твоих не уклонихся.

Юница, Тельца на древе повешена зрящи, зываше.

159. Видех неразумевающия и истаях: яко словес Твоих не сохраниша.

Тело живоносное Иосиф погребает с Никодимом.

160. Виждь, яко заповеди Твоя возлюбих: Господи, по милости Твоей живи мя.

Взываше Отроковица, тепле слезы точащи, утробою прободаема.

161. Начало словес Твоих истина, и во век вся судьбы правды Твоя.

Свете очию Моею, Сладчайшее Мое Чадо! Како во гробе ныне сокрываешися?

162. Князи погнаша мя туне: и от словес Твоих убояся сердце мое.

Мати, не рыдай! Адама и Еву свободити, сия стражду.

163. Возрадуюся аз о словесех Твоих, яко обретаяй корысть многу.

Прославляю Твое, Сыне Мой, крайнее милосердие, егоже ради сия страждеши.

164. Неправду возненавидех и омерзих, закон же Твой возлюбих.

Оцтом напоен был еси и желчию, Щедре, разрушая древнее вкушение.

165. Седмерицею днем хвалих Тя о судьбах правды Твоя.

Ко древу пригвожден был еси, древле люди Твоя столпом облачным покрываяй.

166. Мир мног любящим закон Твой, и несть им соблазна.

Мироносицы, Спасе, ко гробу пришедша, миро приношаху Тебе.

167. Чаях спасения Твоего, Господи, и заповеди Твоя возлюбих.

Востани, Щедре, от пропастей адских возставляяй нас.

168. Сохрани душа моя свидения Твоя и возлюби я зело.

Воскресни, Жизнодавче! Родящая Тя Мати, слезы точащи, глаголет.

169. Сохраних заповеди Твоя и свидения Твоя, яко вси путие мои пред Тобою, Господи.

Потщися воскреснути, Слове. Печаль разрешая чисто Родящая Тя.

170. Да приблизится моление мое пред Тя, Господи: по словеси Твоему вразуми мя.

Небесныя силы ужасошася страхом, мертва Тя зряща.

171. Да внидет прошение мое пред Тя, Господи: по словеси Твоему избави мя.

Любовию и страхом Страсти Твоя почитающим даждь прегрешений разрешение.

172. Отрыгнут устне мои пение, егда научиши мя оправданием Твоим.

О ужаснаго и страннаго видения, Божий Слове! Како земля Тя покрывает?

173. Провещает язык мой словеса Твоя, яко вся заповеди Твоя правда.

С Тобою древле, Спасе, Иосиф бегает: и ныне Тя иный (Иосиф) погробает.

174. Да будет рука Твоя еже спасти мя, яко заповеди Твоя изволих.

Плачет и рыдает Пречистая Мати Твоя, Спасе мой, о Тебе умершем.

175. Возжелах спасение Твое, Господи, и закон Твой поучение мое есть.

Ужасаются умы страннаго и ужаснаго Твоего, всех Создателю, погребения.

176. Жива будет душа моя и восхвалит Тя: и судьбы Твоя помогут мне.

Излияша на гроб мироносицы миро, зело рано пришедша.

177. Заблудих яко овча погибшее: зыщи раба Твоего, яко заповедей Твоих не забых.

Мир Церкви, людем Твоим спасение даруй востанием Твоим.

Слава: **О** Троице Боже мой, Отче, Сыне и Душе, помилуй мир.

И ныне: **Видети** Твоего Сына Воскресение, Дево, сподоби Твоя рабы.

И абие поем тропари сия, во глас 5:

Благословен еси, Господи, научи мя оправданием Твоим.

Ангельский собор удивися, * зря Тебе в мертвых вменившася, * смерти же, Спасе, крепость разоривша, * и с Собою Адама воздвигша, * и от ада * вся свободяща.

Благословен еси, Господи, научи мя оправданием Твоим.

Почто мира * с милостивными слезами, * о ученицы, растворяете? * Блистаяся во гробе Ангел * мироносицам вещаше: * видите вы гроб и уразумейте, * Спас бо воскресе от гроба.

Благословен еси, Господи, научи мя оправданием Твоим.

Зело рано * мироносицы течаху ко гробу Твоему рыдающия, * но предста к ним Ангел и рече: * рыдания время преста, не плачите: * Воскресение же * апостолом рцыте.

Благословен еси, Господи, научи мя оправданием Твоим.

Мироносицы жены, * с мира пришедшия * ко гробу Твоему, Спасе, рыдаху, * Ангел же к ним рече, глаголя: * что с мертвыми Живаго помышляете? * Яко Бог бо * воскресе от гроба.

Слава, Троицен: Поклонимся Отцу, * и Его Сынови, и Святому Духу, * Святей Троице * во Едином Существо, * с Серафимы зовуще: * Свят, Свят, Свят еси, Господи.

И ныне, Богородичен: Жизнодавца рождши, * греха, Дево, Адама избавила еси, * радость же Еве * в печали место подала еси: * падшия же от жизни * к сей направи * из Тебе воплотивыйся Бог * и Человек.

Аллилуиа, трижды.

Таже ектения малая.

Возглас: Ты бо еси Царь мира, Христе Боже наш, и Тебе славу возсылаем, со Безначальным Твоим Отцем, и с Пресвятым и Благим и Животворящим Твоим Духом, ныне и присно, и во веки веков.

И поем седален дне, глас 1.

Подобен: Гроб Твой, Спасе:

Плащаницею чистою * и ароматы Божественными Тело Честное, * испросив у Пилата, * Иосиф миропомазует и полагает в нове гробе. * Темже утру пришедша, мироносицы жены возопиша: * покажи нам, якоже предрекл еси, * Христе, Воскресение.

Слава, конец:

Покажи нам, якоже предрекл еси, * Христе, Воскресение.

И ныне, другий подобен:

Ужасошася лица Ангельстии, * зряще Седящаго в недрах Отчих: * како, яко мертв, во гроб полагается Безсмертный! * Егоже чини Ангельстии окружают и славят * с мертвыми во аде, * яко Зиждителя и Господа.

Таже бывает Евангелии от Матфеа, зачало 114:

Во утрий день, иже есть по пятце, собрашася архиереи и фарисее к Пилату, глаголюще: господи, помянухом, яко льстец он рече, еще сый жив, по триех днех встану. Повели убо утвердити гроб до третияго дне, да не како пришедше ученицы Его нощию украдут Его и рекут людем: воста от мертвых, и будет последняя лесь горша первья. Рече же им Пилат: имате кустодию, идите, утвердите, якоже весте. Они же шедше утвердиша гроб, знаменавше камень с кустодиєю.

Воскресение Христово: не глаголем. Но абие псалом 50.

И поем канон, ирмос по дважды, тропари на 12: и паки последи ирмос оба лика вкупе. Есть же канон, от первья песни до шестья, творение Марка монаха, епископа Идрунтскаго: ирмосы же творение жены некия, Кассии именуемая. От 6-я же песни до конца творение господина Космы. Краегранесие же канона: Каи симерон де Савватон мелпо Мега. Сиесть: И днесь же Субботу пою Великую.

Песнь 1. Глас 6.

Ирмос: Волною морскою * скрывшаго древле гонителя мучителя, * под землею скрыша спасенных отроцы: * но мы, яко отроковицы, Господеви поим: * славно бо прославися.

Господи, Боже мой! Исходное пение и надгробную Тебе песнь воспою, погребением Твоим жизни моя входы отверзшему и смертию смерть и ад умертвившему.

Горе Тя на Престоле и доле во гробе, премирная и подземная, помышляющая, Спасе мой, зыбляхуся умерщвлением Твоим: паче ума бо виден был еси мертв, Живоначалниче.

Да Твоя славы вся исполниши, спел еси в нижняя земли: от Тебе бо не скрыся состав мой, иже во Адаме, и погребен, истлевша мя обновляеши, Человеколюбче.

Песнь 3.

Ирмос: Тебе, на водах * повесившаго всю землю неодолимо, * тварь, видевше на лобнем висима, * ужасом многим содрогашеся: * несть свят, разве Тебе, Господи, взывающа.

Образы погребения Твоего показал еси, видения умножив. Ныне же сокровенная Твоя богомужно уяснил еси и сущим во аде, Владыко: несть свят, разве Тебе, Господи, взывающим.

Простерл еси длани и соединил еси древле разстоящаяся. Одеванием же, Спасе, еже в плащанице и во гробе, окованныя разрешил еси: несть свят, разве Тебе, Господи, взывающа.

Гробом и печатями, Невместиме, содержимь был еси хотением: ибо силу Твою действа показал еси, богодейственно поющим: несть свят, разве Тебе, Господи Человеколюбче.

Седален, глас 1:

Гроб Твой, Спасе, воини стрегущии мертви от облистания явльшагося Ангела быша, проповедающа женам Воскресение. Тебе славим, тли потребителя! Тебе припадаем, Воскресшему из гроба и Единому Богу нашему!

Слава, и ныне, тойже.

Песнь 4.

Ирмос: На кресте Твое Божественное * истощание провидя, Аввакум, * ужасся, вопияше: * Ты сильных пресека еси державу, * Блаже, приобщаяся сущим во аде, * яко Всесилен.

Седмый день днесь освятил еси, егоже древле благословил еси упокоением дел: преводиши бо всяческая и обновляеши, субботаствуя, Спасе мой, и назидая.

Силою лучшаго, победившаго Тебе, от плоти душа Твоя разделися, растерзающе бо обоя узы – смерти и ада, Слове, державою Твоею.

Ад, Слове, срет Тя, огорчися, человека зря обожена, уязвлена ранами и Всесильнодетеля, страшным же зраком погибе.

Песнь 5.

Ирмос: Богоявления Твоего, Христе, * к нам милостивно бывшаго, * Исаиа, Свет виде в Невечерний, * из ноци утреневав, взываше: * воскреснут мертвии и востанут сущии во гробех, * и вси земнороднии возрадуются.

Новотвориши земныя, Создателю, перстен быв, и плащаница и гроб являют еже в Тебе, Слове, таинство. Благообразный бо советник Тебе Рождшаго совет образует, в Тебе велелепно новотворящаго мя.

Смертию – смертное, погребением – тленное прелагаеши: нетленно твориши бо, боголепно бессмертно творя приятие, плоть бо Твоя истления не виде, Владыко, ниже душа Твоя во аде страннолепно оставлена бысть.

Из Небрачныя прошед и прободен в ребра, Содетелю мой, из Нея соделал еси обновление Евино, Адам быв, уснув паче естества сном естественным и жизнь воздвигнув от сна и тления, яко Всесилен.

Песнь 6.

Ирмос: Ят бысть, * но не удержан в персех китовых Иона: * Твой бо образ нося, * Страдавшаго и погребению давшася, * яко от чертога, от зверя изыде: * приглашаше же кустодии: * хранящии суетная и ложная, * милость сию оставили есте.

Биен был еси, но не разделился еси, Слове, еже причастился еси плоти: аще бо и разорися Твой храм во время страсти, но и тако един бе состав Божества и плоти Твоея. Во обоих бо Един еси Сын, Слове Божие, Бог и Человек.

Человекоубийственно, но не богоубийственно бысть прегрешение Адамово: аще бо и пострада Твоя плоти перстное существо, но Божество безстрастно пребысть, тленное же Твое на нетление преложил еси и нетленная жизни показал еси источник Воскресением.

Царствует ад, но не вечнует над родом человеческим: Ты бо, положся во гробе, Державне, живоначальною дланию, смерти ключи развергл еси и проповедал еси от века тамо спящим избавление неложное, быв, Спасе, мертвым первенец.

Кондак, глас 6:

Бездну заключивый мертв зрится, * и сминою, и плащаницею обвився, * во гробе полагается, яко смертный, Бессмертный: * жены же приидоша помазати Его миром, * плачущия горько и вопиющия: * сия Суббота есть преблагословенная, * в нейже Христос, уснув, * воскреснет тридневен.

Икос: Содержай вся на Крест вознесся, и рыдает вся тварь. Того видящи нага висяща на древе, солнце лучи сокры, и звезды отложиша свет: земля же со многим страхом поколебася, и море побеже, и камение распадеся, гроби же многи отверзошася, и тела восташа святых мужей. Ад низу стенет, и иудее советуют оклеветати Христово Воскресение. Жены же зывают: сия Суббота есть преблагословенная, в нейже Христос, уснув, воскреснет тридневен.

Синаксарий. Стихи:

Стих: Всеу храниши гроб, кустодие:

Стих: Не удержит бо рака Самосущую Жизнь.

Во святую и Великую Субботу празднуем боготелесное погребение и во ад сошествие Господа Бога и Спаса нашего Иисуса Христа, имиже наш род, от тления возван быв, к вечней жизни преиде. Вся убо дни святая Четыредесятница превосходит: тоя же паки больша есть сия святая и великая седмица: великия же

седмицы паки больши есть сия Великая и святая Суббота. Глаголется же великая седмица, не яко больши суть дние сии, или часы. но яко великая и преестественная чудеса и изрядная Спаса нашего дела в ней содеяшася, и наипаче днесь. Якоже бо в первом миротворении, всякое дело соделав Бог, и последи главнейшее, в шестый день создав человека, в седмый почи от всех дел Своих, и освяти его, субботу именовав, яже упокоение толкуется: сие и во умнаго мира делании, изрядно вся соделав, и в шестый день паки возсоздав истлевшаго человека, и обновив живоносным Крестом и смертию, в настоящий седмый день упокоися совершенным от дел упокоением, уснув животворным и спасительным сном. Снизходит убо Божие Слово с плотию во гроб, сходит же и во ад с нетленною и Божественною Своею душою, раздельшеюся в смерти от телесе, юже и в руке предаде Отцу, Емуже не просившу и Свою Кровь принесе, избавление нам бывшую. Во аде бо Господня душа, якоже других святых души, не бысть удержана. Како бо? Отнюд не подлежащи прародительней клятве якоже оны. Но и Крови, еюже куплени быхом, не взят враг наш диавол, аще и держаше нас. Како бо аще не точию от Бога? Но Бога Самого можаше ли разбойник диявол яти? Обаче вселися во гроб Господь наш Иисус Христос телесне и с Божеством, совершенне плоти соединившимся. Бяше же с разбойником и в раи, и во аде бяше, якоже речеся, со обоженною Своею душою: преестественно же бе и со Отцом и Духом седяй, яко Бог неописанный: везде же бе, ничтоже Божеству во гробе страждущу, якоже ниже на Кресте пострада. И тление убо, еже есть разрешение души от тела, претерпе Господне Тело: растления же, сиречь разрушения плоти и удес, совершеннаго погубления никакоже. Но Иосиф убо, святое Тело Господне снем, во гробе нове близ Иерусалима в вертограде погребает, камень велий зело ко входу гроба положив. Иудее же, по пятце, приступивше, глаголют Пилату: господи, помянухом, яко льстец Оный рече, егда жив бе, яко по триех днех востану: мнится убо нам добро быти, да твоя власть повелит воинству затвердити гроб. Когда же Христос рече: востану? Мощно есть, яко и от притчи о Ионе пророце сие извождаху иудее. Отвеща же Пилат: аще убо льстец бе, что о глаголах Его печетесь? Тогда бо несумненно умре. Всяко же, глаголют безумнии, аще утвердится гроб, не украдется. Ое, како безумнии не разумеваху, яко, елика себе ради творяху, на ся творяху! Пилату же повелевшу, сами с воины и известною своею печатию затвердиша гроб, да не чуждей сущей стражи и печати, Воскресение Господне оболгано было бы. Но ад отселе содрогается и изумевает, твердейшую силу ощущая: неправеднаго убо ради поглощения Христа, твердейшаго и краугольнаго камене, помале извержет и вся мертвыя, яже от века положи во чреве, снесь сотворив.

Неизреченным снизхождением Твоим,
Христе Боже наш, помилуй нас. Аминь.

Песнь 7.

Ирмос: Неизреченное чудо, * в печи избавивый преподобныя отроки из пламене, * во гробе мертв, бездыханен полагается, * во спасение нас, поющих: * Избавителю Боже, благословен еси.

Уязвися ад в сердце, прием Уязвеннаго копием в ребра, и въздыхает, огнем Божественным иждиваемъ во спасение нас, поющих: Избавителю Боже, благословен еси.

Богат гроб: в себе бо приим яко спяща Содетеля, жизни Божественное сокровище показася, во спасение нас, поющих: Избавителю Боже, благословен еси.

Законом умерших еже во гробе положение, всех приемлет Жизнь, и сего источника показывает востания, во спасение нас, поющих: Избавителю Боже, благословен еси.

Едино бяше неразлучное еже во аде, и во гробе, и во Едеме, Божество Христово со Отцем и Духом, во спасение нас, поющих: Избавителю Боже, благословен еси.

Песнь 8.

Ирмос: Ужаснися бойся небо, * и да подвижатся основания земли: * се бо в мертвецех вменяется в вышних Живый * и во гроб мал странноприемлется, * Егоже, отроцы, благословите: * священницы, воспойте: * людие, превозносите во вся веки.

Разрушися Пречистый храм, падшую же совозставляет скинию: Адаму бо первому Второй, Иже в вышних Живый, сниде даже до адовых сокровищ, Егоже, отроцы, благословите: священницы, воспойте: людие, превозносите во вся веки.

Преста дерзость учеников, Аримафей же изрядствует Иосиф: мертва бо и нага зря над всеми Бога, просит и погребает зовый: отроцы, благословите: священницы, воспойте: людие, превозносите во вся веки.

О чудес новых! О благодсти! О неизреченнаго терпения! Волею бо под землею печатлеется, Иже в вышних Живый, и, яко льстец, Бог оклеветается, Егоже, отроцы, благословите: священницы, воспойте: людие, превозносите во вся веки.

Песнь 9.

Ирмос: Не рыдай Мене, Мати, * зряци во гробе, * Егоже во чреве без семене зачала еси Сына: * встану бо и прославлюся, * и вознесу со славою непрестанно, * яко Бог, * верою и любовию Тя величающия.

В страннем Твоем рождестве, болезней избежавше паче естества, ублажихся, Безначальне Сыне: ныне же Тя, Боже мой, бездыханна зряци мертва, оружием печали растерзаюся люте: но воскресни, яко да возвеличуся.

Земля покрывает Мя хотяща, но устрашаются адовы вратницы, одеяна видяще одеждою окровавленою, Мати, отмщения: враги бо Крестом поразив, яко Бог, воскресну паки и возвеличу Тя.

Да радуется тварь, да веселятся вси земнороднии, враг бо пленися ад: с миры жены да сретают, Адама со Евою избавляю всеродна и в третий день воскресну.

Ирмос: Не рыдай Мене, Мати, * зряци во гробе, * Егоже во чреве без семене зачала еси Сына: * встану бо и прославлюся, * и вознесу со славою непрестанно, * яко Бог, * верою и любовию Тя величающия.

Ексапостиларий, глас 2:

Свят Господь Бог наш. [Трижды.]

Стихиры на хвалитех 4, глас 2:

Днесь содержит гроб Содержащаго дланию тварь, * покрывает камень Покрывшаго добродетелию небеса: * спит Живот, и ад трепещет, * и Адам от уз разрешается. * Слава Твоему смотрению, * имже совершив все упокоение вечное, * даровал еси нам, Боже, * всесвятое из мертвых Твое Воскресение.

Что зримое видение? * Кое настоящее упокоение? * Царь веков, Иже страстию совершив смотрение, * во гробе субботствует, новое нам подая субботство. * Тому возопиим: * воскресни, Боже, судай земли, * яко Ты царствуеши во веки, * неизмерную имея и велию милость.

Приидите, видим Живот наш, * во гробе лежащъ, да во гробех лежащия оживит. * Приидите днесь, Иже из Иуды спяща зряще, * пророчески Ему возопиим: * возлег уснул еси, яко лев, * кто воздвигнет Тя, Царю? * Но востани самовластно, * давай Себе о нас волею, * Господи, слава Тебе.

Глас 6: **П**роси Иосиф тело Иисусово * и положи е в новом своем гробе: * подобаше бо Ему из гроба, * яко из чертога, проити. * Сокрушивый державу смерти * и отверзый врата райская человеком, * Господи, слава Тебе.

Слава, глас 6:

Днешний день тайно * великий Моисей прообразоваше, глаголя: * и благослови Бог день седмый. * Сия бо есть благословенная Суббота. * Сей есть упокоения день, * вонже почи от всех дел Своих * Единородный Сын Божий, * смотрением еже на смерть * плотию субботствовав: * и во еже бе, паки возвращься Воскресением, * дарова нам живот вечный, * яко Един Благ и Человеколюбец.

И ныне, Богородичен, глас 2:

Преблагословенна еси Богородице Дево, * воплощшим бо ся из Тебе ад пленися, * Адам воззвася, клятва потребися, * Ева свободися, смерть умертвися, и мы ожихом, * тем воспевающе вопием: * благословен Христос Бог благоволивый тако, славо Тебе.

Славословие великое. Священник же облачается во всю священническую одежду и, окадив плащаницу трижды, идет под плащаницею со святым Евангелием окрест храма, певаему Трисвятому. По Трисвятом же, став пред царскими врата, священник глаголет:

Священник: Премудрость. И мы тропарь единожды:

Благообразный Иосиф * с древа снем Пречистое Тело Твое, * плащаницею чистою обвив * и благоуханьми, * во гробе нове покрыв положи.

И глаголем тропарь пророчества, глас 2:

Содержай концы, * гробом содержатися изволил еси, Христе, * да от адова поглощения избавиши человечество * и, воскрес, оживиши нас, * яко Бог Безсмертный.

Слава, конец. И ныне, весь.

Таже прокимен, глас 4: Воскресни, Господи, * помози нам и избави нас имене ради Твоего.

Стих: Боже, ушима нашими услышахом, и отцы наши возвестиша нам.

Пророчества Иезекиилева чтение. [Глава 37, ст. 1 – 14.]

Бысть на мне рука Господня, и изведе мя в дусе Господни, и постави мя среде поля: се же бяше полно костей человеческих. И обведе мя окрест их около, и се многи зело на лица поля, и се сухи зело. И рече ко мне: сыне человекъ, оживут ли кости сия? И рекох: Господи Боже, Ты веси сия. И рече ко мне: сыне человекъ, прорцы на кости сия, и речеши им: кости сухия, слышите слово Господне, ее глаголет Адонаи Господь костем сим: ее Аз введу в вас дух животен, и дам на вас жилы, и возведу на вас плоть, и простру по вам кожу, и дам дух Мой в вас, и оживете, и увесте, яко Аз есмь Господь. И прорекох, якоже заповеда ми Господь. И бысть глас внегда ми пророчествовати, и се трус, и совокупляхуся кости, кость к кости, каяждо к составу своему. И видех, и се быша им жилы, и плоть растяше и восхождаше, [и протяжеса] им кожа верху, духа же не бяше в них. И рече ко мне: прорцы о дусе, прорцы, сыне человекъ, и рцы духови: сия глаголет Адонаи Господь: от четырех ветров прииди, душе, и вдуни на мертвыя сия, и да оживут. И прорекох, якоже повеле ми: и вниде в ня дух жизни, и ожиша, и сташа на ногах своих, собор мног зело. И рече Господь ко мне, глаголя: сыне человекъ, сия кости весь дом Израилев есть, тии бо глаголют: сухи быша кости наша, погибе надежда наша, убиени быхом. Того ради прорцы, [сыне человекъ], и рцы к ним: сия глаголет Адонаи Господь: ее Аз отверзу гробы ваща, и изведу вас от гроб ващих, людие Мои, и введу вы в землю Израилеву. И увесте, яко Аз есмь Господь, внегда отверсти Ми гробы ваща, еже возвести Ми вас от гробов ващих, людие Мои: и дам дух Мой в вас, и живи будете. И поставлю вы на земли ващей, и увесте, яко Аз Господь: глаголах, и сотворю, глаголет Адонаи Господь.

Прокимен, глас 7: Воскресни, Господи Боже мой, да вознесется рука Твоя, не забуди убогих Твоих до конца.

Стих: Исповемся Тебе, Господи, всем сердцем моим, повем вся чудеса Твоя.

Апостол к Коринфянам, зачало 133:

Братие, мал квас все смешение квасит. Очистите убо ветхий квас, да будете ново смешение, якоже есте безквасни: ибо Пасха наша за ны пожрен бысть Христос. Темже да празднуем не в квасе ветсе, ни в квасе злобы и лукавства, но в безквасиих чистоты и истины. * Христос ны искупил есть от клятвы законныя, быв по нас клятва: писано бо есть: проклят всяк висяй на древе: да в языцех благословение Авраамле будет о Христе Иисусе, да обетование Духа приимем верою.

Аллилуиа, глас 5: Да воскреснет Бог, и расточатся врази Его, и да бежат от Лица Его ненавидящии Его.

Стих: Яко исчезает дым, да исчезнут, яко тает воск от лица огня.

Стих: Тако да погибнут грешницы от Лица Божия, а праведницы да возвеселятся.

Евангелие от Матфея, зачало 114. [Мф. 27, 62 – 66.]

Во утрий день, иже есть по пятце, собращася архиерее и фарисее к Пилату, глаголюще: господи, помянухом, яко льстец он рече, еще сый жив, по триех днех востану. Повели убо утвердiti гроб до третияго дне, да не како пришедше ученицы Его нощию украдут Его и рекут людем: воста от мертвых, и будет последняя леть горша первыя. Рече же им Пилат: имате кустодию, идите, утвердите, якоже весте. Они же шедше утвердиша гроб, знаменоваше камень с кустодиєю.

Таже ектенна: Рцем вси: и Исполним утреннюю молитву нашу:

Такожде и прочая, яко обычно. И отпуст.

И бывает целование плащаницы: певцы же поют стихиру, глас 5:

Приидите, ублажим Иосифа приснопамятнаго, * в нощи к Пилату пришедшаго и Живота всех испросившаго. * Дажь ми Сего страннаго, * Иже не имеет где главы подклонити: * даждь ми Сего страннаго, * Егоже ученик лукавый на смерть предаде: * даждь ми Сего страннаго, * Егоже Мати, зрящи на Кресте висяща, * рыдаючи вопияше и матерски восклицаше: * увы Мне, Чадо Мое! Увы Мне, * Свете Мой и утробе Моя возлюбленная! * Симеоном бо предреченное в церкви днесь событсья: * Мое сердце оружие пройде, * но в радость Воскресения Твоего плач преложи. * Поклянемся Страстем Твоим, Христе: * поклоняемся Страстем Твоим, Христе: * поклоняемся Страстем Твоим, Христе, * и Святому Воскресению.

Первый же час поется в притворе: третий же час, шестый и девятый поются вкупе просто в притворе с блаженными во свое время.

ВО СВЯТУЮ И ВЕЛИКУЮ СУББОТУ

НА ВЕЧЕРНЯ

О часе десятом дне клевет Вечерню. И облачается священник во одежду, и, благословившу ему, начинаем предначинательный псалом, посем ектенія великая. Таже Господи, воззвах, И поставим стихов 8.

Глас 1

Поем же стихиры воскресныя Осмогласника три, и от стиховны едину.

Воскресны, Глас 1:

Вечерня наша молитвы * приими Святыи Господи, * и подаждь нам оставление грехов, * яко Един еси * Явлей в мире Воскресение.

Обыдите людие Сион * и обымите его, * и дадите славу в нем * Воскресшему из мертвых: * яко Той есть Бог наш, * Избавлей нас от беззаконий наших.

Приидите людие, * воспоим, и поклонимся Христу, * славяще Его из мертвых Воскресение: * яко Той есть Бог наш, * от прелести вражия мир Избавлей.

Страстию Твоею Христе, * от страстей свободихомся, * и воскресением Твоим * из исления избавихомся, * Господи, слава Тебе.

Ины стихиры самогласны, Великия Субботы три, повторяюще первую,

Глас 8:

Днесь ад, стена, вопиет: * уне мне бяше, * аще бых от Марии Рожденнаго не приял: * нашед бо на мя, державу мою разруши, * врата медная сокруши: * души, яже содержах прежде, * Бог сый воскреси. * Слава, Господи, Кресту Твоему * и Воскресению Твоему. [Дважды]

Днесь ад, стена, вопиет: * разрушися моя власть: * приях Мертваго яко единого от умерших, * держати же Сего отнюдь не могу, * но погубляю с Ним вся, * над нимиже царствовах: * аз имех мертвецы от века, * но се Сей всех воздвизает. * Слава, Господи, Кресту Твоему * и Воскресению Твоему.

Днесь ад, стена, вопиет: * поглощена бысть моя держава. * Пастырь распятыя и Адама воскреси: * над нимиже царствовах, тех лишихся, * и яже поглотих возможий, всех извергох. * Истоци гробы Распныйся, * изнемогает смерти держава. * Слава, Господи, Кресту Твоему * и Воскресению Твоему.

Слава, глас 6:

Днешний день таинственно * великий Моисей прообразоваше, глаголя: * и благослови Бог день седмый. * Сия бо есть благословенная Суббота, * сей есть упокоения день, * вонже почи от всех дел Своих * Единородный Сын Божий, * по смотрению на смерть, * плотию субботствовав: * и еже бе, в то паки возвращая, * воскресением дарова нам жизнь вечную, * яко Един Благ и Человеколюбец.

И ныне, Богородичен, глас 1:

Всемирную славу, от человек прозябшую и Владыку рождшую, небесную дверь, воспоим Марию Деву, безплотных песнь и верных удобрение: Сия бо явися

небо и храм Божества: Сия, преграждение вражды разрушивши, мир введе и Царствие отверзе. Сию убо имуще веры утверждение, поборника имама из Нея рождашагося Господа. Дерзайте убо, дерзайте, людие Божии: ибо Той победит враги, яко Всесилен.

Вход с Евангелием. Свете тихий:

ПРОКИМЕН НЕ ГЛАГОЛЕМ,

Но абие: Премудрость. И начинается чтец чтения.

Бытия чтение. [Гл. 1, ст. 1 – 13]

В начале сотвори Бог небо и землю. Земля же бе невидима и неустроена, и тьма верху бездны: и Дух Божий ношашеся верху воды. И рече Бог: да будет свет. И бысть свет. И виде Бог свет, яко добро: и разлучи Бог между светом и между тьмою. И нарече Бог свет день, а тьму нарече ночь. И бысть вечер, и бысть утро, день един. И рече Бог: да будет твердь посреде воды, и да будет разлучающи посреде воды и воды. И бысть тако. И сотвори Бог твердь: и разлучи Бог между водою, яже бе под твердию, и между водою, яже бе над твердию. И нарече Бог твердь небо. И виде Бог, яко добро. И бысть вечер, и бысть утро, день второй. И рече Бог: да соберется вода, яже под небесем, в собрание едино, и да явится суша. И бысть тако. И собрася вода, яже под небесем, в собрания своя, и явися суша. И нарече Бог сушу землю, и собрания вод нарече моря. И виде Бог, яко добро. И рече Бог: да прорастит земля былие травное, сеющее семя по роду и по подобию, и древо плодовитое творящее плод, емуже семя его в нем, по роду на земли. И бысть тако. И изнесе земля былие травное, сеющее семя по роду и по подобию, и древо плодовитое творящее плод, емуже семя его в нем, по роду на земли. И виде Бог, яко добро. И бысть вечер, и бысть утро, день третий.

Пророчества Исаина чтение. [Гл. 60, ст. 1 – 16]

Светися, светися, Иерусалиме, прииде бо твой свет, и слава Господня на тебе возсия. Се тьма покрывает землю, и мрак на языки, на тебе же явится Господь, и слава Его на тебе узрится. И пойдут царие светом твоим, и языцы светлостию твоею. Возведи окрест очи твои, и виждь собранная чада твоя: се приидоша вси сынове твои издалеча, и дщери твоя на рамах возмутся. Тогда узриши, и возрадуешися, и убоишися, и ужаснешися сердцем, яко преложится к тебе богатство морское и языков и людей. И приидут к тебе стада вельблюдов, и покрывают тя вельблюды Мадиямстии и Гефарстии: вси от Савы приидут, носяще золото, и ливан принесут, и камень честен, и спасение Господне благовозвестят. И вся овцы Кидарския соберутся тебе, и овни Навеофстии приидут к тебе, и вознесутся приятная на жертвенник Мой, и дом молитвы Моея прославится. Кии суть, иже яко облацы летят, и яко голуби со птенцы ко Мне? Мене острови ждаша, и корабли Фарсийстии в первых, привести чада твоя издалеча, и серебро и золото их с ними, имене ради Господня Святаго, и за еже Святому Израилеву славу быти. И созиждут сынове инороднии стены твоя, и царие их предстояти будут тебе: за гнев бо Мой поразих тя, и за милость Мою возлюбих тя. И отверзутся врата твоя присно, день и ночь не затворятся, ввести к тебе силу язык и цари их ведомыя. Языцы бо и царие, иже не поработают ти, погибнут, и языцы запустением запустеют. И слава Ливанова к тебе приидет, кипарисом и певгом и кедром вкупе,

прославити место святое Мое, и место ног Моих прославолю. И пойдут к тебе боящиеся сынове смиривших тя и раздраживших тя, и поклонятся следом ног твоих вси прогневавшии тя: и наречешися град Господень, Сион Святаго Израилева. За сие, яко был еси оставлен и возненавиден, и не бе помогающаго ти, положу тя в радость вечную, веселие родом родов. И иссееши млеко языков, и богатство царей снеси, и уразумееш, яко Аз Господь спасаюй тя и избавляюй тя Бог Израилев.

Исхода чтение. [Гл. 12, ст. 1 – 11]

Рече Господь к Моисею и Аарону в земли Египетстей, глаголя: месяц сей вам начало месяцев, первый будет вам в месяцах лета. Рцы ко всему сонму сынов Израилевых, глаголя: в десятый месяца сего да возмет кийждо овча по домом отечеств, кийждо овча по дому. Аще же мало их есть в дому, яко не довольным быти на овча, да возмет с собою соседа ближняго своего по числу душ: кийждо довольное себе сочтет на овча. Овча совершенно, мужеск пол, непорочно и единоголетно будет вам: от агнец, и от козлищ, примете. И будет вам соблюдено даже до четвертагонадесять дне месяца сего: и заколют то все множество собора сынов Израилевых к вечеру. И примут от крове, и помажут на обою подвою и на прагах в домех, в нихже снут тое. И снут мяса в ноци той печена огнем, и опресноки с горьким зелием снут. Не снете от них сурово, ниже варено в воде, но печеное огнем, главу с ногами и со утробою. Не оставите от него до утрия, и кости не сокрушите от него: останки же от него до утра огнем сожжете. Сице же снести е: чресла ваша препоясана, и сапозы ваши на ногах ваших, и жезлы ваши в руках ваших: и снете е со тцанием: пасха есть Господня.

Пророчества Ионины чтение.

[Гл. 1, ст. 1 – 16; гл. 2, ст. 1 – 11; гл. 3, ст. 1 – 10; гл. 4, ст. 1 – 14]

Бысть слово Господне ко Ионе сыну Амафиину, глаголя: востани, и иди в Ниневию град великий: и проповеждь в нем, яко взыде вопль злобы его ко Мне. И воста Иона, еже бежати в Фарсис от Лица Господня: и сниде во Иопсию, и обрете корабль идущь в Фарсис: и даде наем свой, и вниде вонь плиты с ними в Фарсис от Лица Господня. И Господь воздвиже ветр велий на мори, и бысть буря великая в мори, и корабль бедствовал еже сокрушится. И убояшася корабельницы, и возопиша кийждо к богу своему, и изметание сотвориша сосудов, иже в корабли, в море, еже облегчитися от них: Иона же сниде во дно корабля, и спаше ту, и храпляше. И прииде к нему кормчий, и рече ему: что ты храплеши? Востани, и моли Бога твоего, яко да спасет ны Бог, да не погибнем. И рече кийждо ко искреннему своему: приидите, вержим жребия, и уразумеем, кого ради есть зло сие на нас. И метнуша жребия, и паде жребий на Иону. И реша к нему: возвести нам, кого ради сие зло на нас, и что твое делание есть, и откуда грядеши и камо идеши, и от коея страны, и от киих людей еси ты? И рече к ним: раб Господень есмь аз, и Господа Бога Небеснаго аз чту, Иже сотвори море и сушу. И убояшася мужие страхом великим, и реша к нему: что сие сотворил еси? Зане разумеша мужие, яко от Лица Господня бежаше, яко возвести им. И реша к нему: что тебе сотворим, и утолится море от нас? Зане море восхождаше и воздвизаше паче волнение. И рече к ним Иона: возьмите мя, и вверзите в море, и утолится море от вас: понеже познах аз, яко мене ради волнение сие великое на вы есть. И нуждахуся мужие

возвратитися к земли, и не можаху, яко море восхождаше и воздвизашесе паче на них. И возопиша к Господеви, и реща: никакоже, Господи, да не погибнем души ради человека сего, и не даждь на нас крове праведных: зане Ты, Господи, якоже восхотел, сотворил еси. И взяша Иону, и ввергоша его в море: и преста море от волнения своего. И убояшася мужие страхом великим Господа, и пожроша жертву Господеви, и помолишася молитвами. И повеле Господь киту великому пожрети Иону: и бе Иона во чреве китове три дни и три нощи. И помолися Иона ко Господу Богу своему от чрева китова, и рече:

[Молитва:]

Возопих в скорби моей ко Господу Богу моему, и услыша мя: из чрева адова вопль мой, услышал еси глас мой. Отвергл мя еси во глубины сердца морского, и реки обыдоша мя: вся высоты Твоя и волны Твоя на мне преидоша. И аз рех: отринулся от очию Твоею: еда приложу призрети ми ко храму святому Твоему? Возлияся на мя вода до души моя, бездна обыде мя последняя, понре глава моя в раселины гор. Снидох в землю, еже верей ея заклеи вечнии: и да взыдет из исления живот мой к Тебе, Господи Боже мой. Внегда скончаватися от мене души моей, Господа помянух, и да приидет к Тебе молитва моя, ко храму святому Твоему. Хранящим суетная и ложная, милость свою оставиша. Аз же со гласом хваления и исповедания пожру Тебе: елика обещах, воздам Тебе во спасение мое Господеви.

И повеле Господь китови, и изверже Иону на сушу. И бысть слове Господне ко Ионе вторицею, глаголя: востани, и иди в Ниневию град великий, и проповеждь в нем по проповеди прежней, юже аз глаголах тебе. И воста Иона, и иде в Ниневию, якоже глагола Господь: Ниневия же бяше град велик Богу, яко шествия пути трех дней. И начат Иона входитьи во град, яко шествие пути дне одинаго, и проповеда, и рече: еще три дни, и Ниневия превратится. И вероваша мужие Ниневийстии Богови, и заповедаша пост, и облекошася во вретница от велика их даже до мала их. И дойде слово к царю Ниневийскому, и воста с престола своего, и сверже ризы своя с себе, и облечеся во вретнице, и седе на пепеле. И проповедася, и речено бысть в Ниневии от царя и вельмож его, глаголющих: человецы и скоти, и волове, и овцы да не вкусят ничесоже, ни да пасутся, ниже воды да пинут. И облекошася во вретница человецы и скоти, и возопиша прилежно к Богу: и возвратися кийждо от пути своего лукаваго и от неправды сущия в руках их, глаголюще: кто весть, аще раскается и умолен будет Бог, и обратится от гнева ярости Своея, и не погибнем? И виде Бог дела их, яко обратишася от путей своих лукавых: и раскаяся Бог о зле, еже глаголаше сотворити им, и не сотвори. И опечалися Иона печалию великою, и смутися. И помолися ко Господу, и рече: о Господи, не сия ли убо словеса моя, яже глаголах, еще сущу ми на земли моей? Сего ради предварих бежати в Фарсис, зане разумех, яко Милостив Ты еси и Щедр, Долготерпелив и Многомилостив, и кайся о злобах (человеческих). И ныне, Владыко Господи, приими душу мою от мене, яко уне ми умрети, нежели жити. И рече Господь ко Ионе: аще зело опечалился еси ты? И изыде Иона из града, и седе прямо града, и сотвори себе кушу, и седяше под нею в сени, дондеже увидит, что будет граду. И повеле Господь Бог тыкве, и возрасте над главою Иониною, да будет сень над главою его, еже осенити его от

злых его: и возрадовася Иона о тыкве радостию великою. И повеле Господь Бог червию раннему во утрие, и подъяде тыкву, и изспе. И бысть вкупе внегда возсияти солнцу, и повеле Бог ветру знойну жегущу, и порази солнце на главу Ионину: и малодушествоваше, и отрицашеся души своя, и рече: уне ми умрети, нежели жити. И рече Господь Бог ко Ионе: зело ли опечалился еси ты о тыкве? И рече (Иона): зело опечалихся аз даже до смерти. И рече Господь: ты оскорбился о тыкве, о нейже не трудился еси, ни воскормил еси ея, яже родися об нощь, и об нощь погибе: Аз же не пощажу ли Ниневии града великаго, в немже живут множайшии, неже дванадесять тем человек, иже не познаша десницы своя, ниже шуицы своя, и скоти их мнози?

Иисуса Навина чтение. [Гл. 5, ст. 1 – 15]

Ополчишася сынове Израилевы в Галгалех, и сотвориша пасху в четвертыйнадесять день месяца от вечера, на западе, на поли Иерихонстем. И ядоша от пшеницы земли оныя опресноки и новая. В той день преста манна, повнегда ядоша от пшеницы земли, и ктому не бысть сыном Израилевым манны, но ядоша от плодов земли *Финическия в лето оное. И бысть егда бяше Иисус у Иерихона, и возрев очима своима, виде человека стояща пред ним, и меч его обнажен в руце его. И, приступив, Иисус рече ему: наш ли еси, или от супостат наших? Он же рече ему: аз Архистратиг силы Господни, ныне приидох [семо]. И Иисус паде лицом своим на землю, и поклонися ему, и рече: господи, что повелеваеши рабу твоему? И рече Архистратиг Господень ко Иисусу: изуй сапог с ногу твоею: место бо, на немже ты стоиши, свято есть. И сотвори Иисус тако. [* Евр. Библ.: Ханаанския]

Исхода чтение. [Гл. 13, ст. 20 – 22; гл. 14, ст. 1 – 32; гл. 15, ст. 1 – 19]

Воздвигшеся сынове Израилевы от Сокхофа, ополчишася во Офоме при пустыни. Бог же вождаше их в день убо столпом облачным, показати им путь: нощию же столпом огненным, светити им. И неоскуде столп облачный во дни и столп огненный нощию пред всеми людьми. И рече Господь к Моисею, глаголя: рцы сыном Израилевым, и обратившеся да ополчатся прямо придворию, между Магдолом и между морем, прямо Веельсепфону: пред ними ополчишия при мори. И речет фараон людем своим о сынах Израилевых: заблуждают сии по земли, затвори бо их пустыня. Аз же ожесточу сердце фараоново, и поженет созади их: и прославлюся в фараоне и во всем воинстве его, и уразумеют вси египтяне, яко Аз есмь Господь. И сотвориша тако. И возвещено бысть царю египетскому, яко бежаша людие. И превратися сердце фараоново и рабов его на люди, и рекоша: что сие сотворихом, отпустивше сыны Израилевы, да не работают нам? Впряже убо фараон колесницы своя, и вся люди своя собра с собою: и поят шесть сот колесниц избранных, и вся кони египетския, и тристаты над всеми. И ожесточи Господь сердце фараона царя египетскаго и рабов его, и погна созади сынов Израилевых: сынове же Израилевы исхождаху рукою высокою. И погнаша египтяне вслед их, и обретоша их ополчившихся при мори: и вси кони и колесницы фараоновы, и конницы, и воинство его прямо придворию, противу Веельсепфона. И фараон приближашеся. Возревше же сынове Израилевы очима, видеша: и се египтяне ополчишася вслед их: и убояшася зело, и возопиша сыново Израилевы ко Господу, и рекоша к Моисею: за

еже не быти гробом во Египте, извел еси нас умертвити в пустыни: что сие сотворил еси нам, извед нас из Египта? Не сей ли бяше глагол, егоже рекохом к тебе во Египте, глаголюще: остави нас, да работаем египтяном? Лучше бо бяше нам работати египтяном, нежели умерети в пустыни сей. Рече же Моисей к людем: дерзайте, стойте, и зрите спасение еже от Господа, еже сотворит нам днесь: имже бо образом видесте египтян днесь, не приложите ктому видети их в вечное время. Господь поборет по вас, вы же умолкните. И рече Господь к Моисею: что вопиеша ко Мне? Рцы сыном Израилевым, и да путешествуют. Ты же возми жезл твой, и простири руку твою на море, и расторгни е: и да внидут сынове Израилевы посреде моря по суху. И се Аз ожесточу сердце фараоново и всех египтян, и внидут вслед их: и прославлюся в фараоне, и во всем воинстве его, и в колесницах и в конех его. И уведят вси египтяне, яко Аз есмь Господь, егда прославлюся в фараоне и в колесницах и в конех его. Взятся же Ангел Божий, ходяй пред полком сынов Израилевых, и пойде создаи их: взятся же и столп облачный от лица их, и ста создаи их. И вниде посреде полка египетска и посреде полка сынов Израилевых, и ста: и бысть тьма и мрак, и прииде нощь, и не смесишася друг с другом во всю нощь. Простре же Моисей руку на море: и возгна Господь море ветром южным сильным всю нощь, и сотвори море сушу, и разступися вода. И внидоша сынове Израилевы посреде моря по суху: и вода им стена бысть одесную и стена ошуюю. Погнаша же египтяне, и внидоша вслед их, и всяк конь фараонов и колесницы, и всадницы посреде моря. Бысть же в стражу утреннюю, и воззре Господь на полк египетский в столпе огненном и облачном, и смяте полк египетский, и связа оси колесниц их и ведяше их с нуждою. И рекоша египтяне: бежим от лица Израилева, Господь бо побораеет по ним на египтяны. И рече Господь к Моисею: простири руку твою на море, и да совокупится вода, и да покрывает египтяны, колесницы же и всадники. Простре же Моисей руку на море, и устроися вода ко дню на место: египтяне же бежаша под водою: и истрясе Господь египтяны посреде моря. И обратившися вода покры колесницы и всадники и всю силу фараонову, вшедши вслед их в море: и не оста от них ни един. Сынове же Израилевы проидоша по суху посреде моря: вода же им стена (бысть) одесную и стена ошуюю. И избави Господь Израиля в день он из руки египетския: и видеша сынове Израилевы египтян измерших при краи моря. Виде же Израиль руку великую, яже сотвори Господь египтянам: и убояшася людие Господа, и вероваша Богу и Моисею угоднику Его.

Тогда воспе Моисей и сынове Израилевы песнь сию Господеви, и рекоша, глаголюще:

Чтец глаголет: Поим Господеви:

И поют на глас 5: Славно бо прославися.

И чтец коемуждо лику стихи предглаголет:

Коня и всадника вверже в море.

Поим Господеви: Славно бо прославися.

И людие на оба лика поют: Славно бо прославися.

Помощник и Покровитель бысть мне во спасение.

Поим Господеви: Славно бо прославися.

Сей мой Бог, и прославлю Его: Бог отца моего, и вознесу Его.

Поим Господеви: Славно бо прославися.

Господь сокрушай брани, Господь имя Ему: колесницы фараоновы и силу его вверже в море.

Поим Господеви: Славно бо прославися.

Избранная всадники тристаты потопа в Чермном мори.

Поим Господеви: Славно бо прославися.

Пучиною покры их, погрязоша во глубине яко камень.

Поим Господеви: Славно бо прославися.

Десница Твоя, Господи, прославися в крепости.

Поим Господеви: Славно бо прославися.

Десная Твоя рука, Господи, сокруши враги, и множеством славы Твоя стерл еси сопротивных.

Поим Господеви: Славно бо прославися.

Послал еси гнев Твой, пояде я яко стеблие, и духом ярости Твоя разступися вода.

Поим Господеви: Славно бо прославися.

Огустеша яко стена воды, огустеша и волны посреде моря.

Поим Господеви: Славно бо прославися.

Рече враг: гнав постигну, разделю корысть, исполню душу мою, убию мечем моим, господствовать будет рука моя.

Поим Господеви: Славно бо прославися.

Послал еси Духа Твоего, покры я море: погрязоша, яко олово, в воде зельней.

Поим Господеви: Славно бо прославися.

Кто подобен Тебе в бозех, Господи? Кто подобен Тебе?

Прославлен во святых, Дивен в славе, творяй чудеса?

Поим Господеви: Славно бо прославися.

Простер еси десницу Твою, пожре я земля. Наставил еси правдою Твоею люди Твоя сия, яже избавил еси.

Поим Господеви: Славно бо прославися.

Утешил еси крепостию Твоею во обитель святую Твою. Слышаша языцы и прогневаша, болезни прияша живущий в Филистиме.

Поим Господеви: Славно бо прославися.

Тогда потщашася владыки Едомстии и князи Моавитстии, прият я трепет: растаяша вси живущий в Ханаане.

Поим Господеви: Славно бо прославися.

Да нападет на ня страх и трепет, величием мышцы Твоя да окаменятся.

Поим Господеви: Славно бо прославися.

Дондеже пройдут людие Твои, Господи, дондеже пройдут людие Твои сии, яже стяжал еси.

Поим Господеви: Славно бо прославися.

Ввел насади я в гору достояния Твоего, в готовое жилище Твое, еже соделал еси, Господи, святыню, Господи, юже уготовасте руже Твои.

Поим Господеви: Славно бо прославися.

Господь царствуй веки, и на век, и еще. Егда вниде конница фараонова с колесницами и всадники в море, и наведе на них Господь воду морскую.

Поим Господеви: Славно бо прославися.

Сынове же Израилевы проидоша сушею посреде моря.

Поим Господеви: Славно бо прославися.

Слава, Поим Господеви: Славно бо прославися.

И ныне. Поим Господеви: Славно бо прославися.

И последи чтец поет тожде: Славно бо прославися.

Пророчества Софониева чтение. [Гл. 3, ст. 8 – 15]

Тако глаголет Господь: потерпи Мене в день воскресения Моего во свидетельство: зане суд Мой в сонмища языков еже прияти царей, еже излияти на ня гнев Мой весь, гнев ярости Моея: зане огнем рвеня Моего поядена будет вся земля. Яко тогда обращу к людем язык в род его, еже призвати всем имя Господне, работати ему под игом едином. От конец рек Ефиопских прииму молящия Мя, в рассеянных Моих принесут жертвы Мне. В день он не имаши постыдиться от всех начинаний твоих, имиже нечествовал еси в Мя: яко тогда отыму от тебе укоризны досаждения твоего, и ктому не имаши приложити величатися на горе святей Моей. И оставлю в тебе люди кротки и смиренны, и будут благоговети о имени Господни останцы Израилевы, и не сотворят неправды, и не возглаголют суетных, и не обрящется во устех их язык льстив: зане тии пожируют, и угнездятся, и не будет устрашай их. Радуйся, дщи Сионова, зело: проповедай, дщи Иерусалимова: веселися и преукрашайся от всего сердца твоего, дщи Иерусалимля! Отъят Господь неправды твоя, избавил тя есть из руки враг твоих: воцарится Господь посреде тебе, и не узриши зла ктому.

Царств третних чтение. [Гл. 17, ст. 8 – 23]

Бысть глагол Господень ко Илии, глаголя: востани, и иди в Сарепту Сидонскую, и пребуди тамо: се бо заповедах тамо жене вдовице препитати тя. И воста, и иде в Сарепту Сидонскую, и прииде ко вратам града: и се тамо жена вдова собираше дрова. И возопи Илия вслед ея, и рече ей: принеси ныне ми мало воды в сосуде, и испию. И иде взяти. И возопи вслед ея Илия, и рече ей: приими убо мне и укрух хлеба в руже своей, да ям. И рече жена: жив Господь Бог твой, аще есть у мене опреснок: но токмо горсть муки в водоносе, и мало елеа в чванце: и се аз соберу два поленца, и вниду, и сотворю е себе и детем моим, и снемы е, и умрем. И рече к ней Илия: дерзай, вниди, и сотвори по глаголу твоему: но сотвори ми отуду опреснок мал прежде, и принеси ми: себе же и чадом своим да

сотвориши послежде. Яко тако глаголет Господь Бог Израилев: водонос муки не оскудеет и чванец елеа не умалится до дне, дондеже даст Господь дождь на землю. И иде жена, и сотвори по глаголу Илиину, и даде ему, и яде той, и та, и чада ея. И от того дне водонос муки не оскуде, и чванец елеа не умалися, по глаголу Господню, егоже глагола рукою Илииною. И бысть по сих, и разболеся сын жены госпожи дому, и бе болезнь его крепка зело, дондеже не остана в нем дух его. И рече ко Илии: что мне и тебе, человеце Божий? Вшел еси ко мне вспомянути неправды моя и уморити сына моего? И рече Илия к жене: даждь ми сына твоего. И взят его от недра ея, и вознесе его в горницу, идеже сам почиваше, и положи его на одре своем. И возопи Илия ко Господу, и рече: увы мне, Господи, свидетелю вдовы, у неяже аз ныне пребываю. Ты озлобил еси еже уморити сына ея. И дуну на отрочища трижды, и призва Господа, и рече: Господи Боже мой, да возвратится убо душа отрочища сего вонь. И бысть тако. И возопи отрочищ и сведе его с горницы в дом, и даде его матери его. И рече Илия: виждь, жив есть сын твой. И рече жена ко Илии: се уразумех, яко человек Божий еси ты, и глагол Господень во устех твоих истинен.

Пророчества Исаина чтение. [Гл. 61, ст. 10 – 11; гл. 62, ст. 1 – 5]

Да возрадуется душа моя о Господе: облече бо мя в ризу спасения, и одеждою веселия [одея мя]: яко на жениха возложи на мя венец, и яко невесту украси мя красотою. И яко земля растящая цвет свой, и яко вертоград семена своя прозябает: тако возрастит Господь правду и веселие пред всеми языки. Сиона ради не умолчу, и Иерусалима ради не попущу, дондеже изыдет яко свет правда моя, и спасение мое яко светило разжжется. И узрят языцы правду твою, и царие славу твою, и прозовут тя именем новым, имже Господь наименует е. И будеши венец доброты в руце Господни и диадима царствия в руце Бога твоего. И не прозовешися ктому оставлен, и земля твоя ктому не наречется пуста: тебе бо прозовется воля моя, и земля твоя вселенная: яко благоволи Господь в тебе, и земля твоя вкупе населится. И якоже живяй юноша с девою, тако поживут сынове твой с тобою: и будет якоже радуется жених о невесте, тако возрадуется Господь о тебе.

Бытия чтение. [Гл. 22, ст. 1 – 18]

Бысть по глаголах сих, Бог искушаше Авраама, и рече ему: Аврааме, Аврааме. И рече: се аз. И рече: поими сына твоего возлюбленного, егоже возлюбил еси, Исаака, и иди на землю високу, и вознеси его тамо во всеожжение, на едину от гор, ихже ти реку. Востав же Авраам утро оседла ослия свое, поят же с собою два отрочища и Исаака сына своего: и растнив дрова во всеожжение, востав иде, и прииде на место, еже рече ему Бог, в третий день. И возрев Авраам очима своими, виде место издалече. И рече Авраам отроком своим: сядите zde со осятем: аз же и детищ пойдем до онде, и поклонившися возвратимся к вам. Взя же Авраам дрова всеожжения, и возложи на Исаака сына своего: взя же в руки и огонь и нож, и идоста оба вкупе. Рече же Исаак ко Аврааму отцу своему: отче. Он же рече: что есть, чадо? Рече же: се огонь и дрова, где есть овча еже во всеожжение? Рече же Авраам: Бог узрит Себе овча во всеожжение, чадо. Шедше же оба вкупе, приидоста на место, еже рече ему Бог: и созда тамо Авраам жертвенник, и возложи дрова: и связав Исаака сына своего, возложи его на жертвенник верху дров. И простре Авраам руку свою взяти нож, заклати сына

своего. И воззва и Ангел Господень с небесе, и рече: Аврааме, Аврааме. Он же рече: се аз. И рече: да не возложиши руки твоя на отрочища, ниже да сотвориши ему что: ныне бо познах, яко боишися ты Бога и не пощадел еси сына твоего возлюбленного Мене ради. И воззрев Авраам очима своими виде, и се овен един держимын рогама в саде савек: и иде Авраам, и взя овна, и вознесе его во всесожжение вместо Исаака сына своего. И нарече Авраам имя месту тому: Господь виде: да рекут днесь: на горе Господь явися. И воззва Ангел Господень Авраама вторицею с небесе, глаголя: Мною Самем кляхся, глаголет Господь, егоже ради сотворил еси глагол сей, и не пощадел еси сына твоего возлюбленного Мене ради: воистинну благословя благословлю тя, и умножая умножу семя твое, яко звезды небесныя и яко песок вскрай моря: и наследит семя твое грады супостатов: и благословятся о семени твоём вси языцы земнии, занеже послушал еси гласа Моего.

Пророчества Исаина чтение. [Гл. 61, ст. 1 – 9]

Дух Господень на Мне, егоже ради помаза Мя, благовестити нищим посла Мя, исцелити сокрушенные сердцем, проповедати пленником отпущение и слепым прозрение: нареци лето Господне приятно и день воздаяния, утешити вся плачущия: дати плачущим Сиона славу вместо пепела, помазание веселия плачущим, украшение славы вместо духа уныния: и нарекутся родове правды, насаждение Господне в славу. И созиждут пустыни вечныя, запустевшия прежде воздвигнут: и обновят грады пустыя, опустошенные в роды. И приидут инороднии, пасущии овцы твоя, и иноплеменницы оратели, и виноградари ваши. Вы же священницы Господни наречетеся, служителие Бога вашего, речется вам: крепость язык снесите, и в богатстве их чудни будете. Сице землю свою вторицею наследят, и веселие вечное над главою их. Аз бо есмь Господь любяй правду и ненавидай грабления от неправды: и дам труд их праведником, и завет вечен завещаю им. И познается во языцех семя их, и внуцы их посреди людей: всяк видяй я познает я, яко сии суть семя благословенное от Бога, и радостию возрадуются о Господе.

Царств четвертых чтение. [Гл. 4, ст. 8 – 37]

Бысть во един день, и преиде Елисей в Соман, и ту жена велия, и удержа его снести хлеба: и бысть ему входитьи и исходитьи множицею, и уклоняшеся тамо ясти хлеба. И рече жена к мужу своему: се ныне разумех, яко человек Божий свят сей мимоходит нас присно: сотворим убо ему горницу, место мало, и поставим ему тамо одр, и трапезу, и престол, и свещник: и будет внегда входитьи ему к нам, и уклоняется тамо. И бысть во един день, и вниде тамо, и уклонися в горницу, и спа тамо. И рече ко Гиезию отрочищу своему: призови ми соманитяныню сию. И призва ю, и ста пред ним. И рече ему: рцы убо ей: се удивила еси нас всем попечением сим: что подобает сотворити тебе? Аще есть тебе слове к царю или ко князю силы? Она же рече: [несть,] посреде людей моих аз есмь живущи. И рече ко Гиезию: что подобает сотворити ей? И рече Гиезий отрочищ его: воистинну сына несть у нея, и муж ея стар. И рече: призови ю. И призва ю, и ста при дверех. И рече Елисей к ней: во время сие, якоже час сей живущи, ты зачнеши сына. Она же рече: ни, господине, не солжи рабе твоей. И зачат во чреве жена, и роди сына во время сие, якоже час сей живущи, якоже глагола к ней Елисей. И возмужа

отрочищ: и бысть, егда изыде ко отцу своему, к жнущим, и рече ко отцу своему: глава моя, глава моя [болит]. И рече ко отроку: неси его к матери его. И носе его к матери его, и лежаше на колену ея до полудне, и умре. И вознесе его, и положи его на одре человека Божия: и затвори его, и изыде, и призва мужа своего, и рече ему: послѣ ми убо единого от отрок, и едино от ослѣт, и теку до человека Божия, и возвращуся. И рече: что яко ты идеши к нему днесъ? Не новъ мѣсяцъ, ниже суббота. Она же рече: мир. И осѣдла ослѣ, и рече ко отрочищу своему: веди, и иди, да не удержиши мене, еже всести, якоже реку тебе: гряди, и иди, и прииди к человеку Божию на гору Кармильскую. И иде, и прииде до человека Божия в гору Кармильскую. И бысть яко виде ю Елиссею грядущую, и рече к Гиезию отрочищу своему: се убо соманитяныня оная: ныне тебѣ в сретение ея, и речеши ей: мир ли тебе? И тече во сретение ей, и рече ей: мир ли тебе? Мир ли мужу твоему? Мир ли отрочищу твоему? Она же рече: мир. И прииде к Елиссею на гору, и ятсѣ за нозе его: и приближися Гиезий отринуть ю. И рече Елиссею: остави ю, яко душа ея болезненна в ней, и Господь укрѣ от мене и не возвести мене. Она же рече: еда просих сына у господина моего, яко рекох: не прельсти мене? И рече Елиссею ко Гиезию: препояши чресла твоя, и возьми жезл мой в руке твои, и иди, яко аще обрящеши мужа, да не благословиши его, и аще благословит тя муж, не отвѣщай ему: и возложи жезл мой на лице отрочища. И рече мати отрочища: жив Господь, и жива душа твоя, аще оставлю тебе. И воста Елиссею, и иде вслѣд ея. И Гиезий иде пред нею, и возложи жезл на лице отрочища, и не бе гласа, и не бе слышанія. И возвратисѣ в сретение его, и поведа ему, глаголя: не воста отрочищ. И вниде Елиссею в храмину, и се отрочищ умерый положен на одре его. И вниде Елиссею в дом, и затвори дверь за двою собою, и помолися Господу. И възыде, и ляже на отрочищи, и положи уста своя на устех его, и очи свои на очи его, и руке свои на руке его, и плесне свои на плесну его: и слячѣся над ним, и дуну на него, и согрѣся плоть отрочища. И обратисѣ, и походи в храмине сюду и сюду: и възыде, и слячѣся над отрочищем седмижды: и отверзе отрочищ очи свои. И возопи Елиссею ко Гиезию, и рече: призови ми соманитяныню сию. И призва ю, и вниде к нему. И рече Елиссею: приими сына твоего. И вниде жена, и паде на ногу его, и поклонисѣ ему до земли: и прият сына своего, и изыде.

Пророчества Исаина чтение. [Гл. 63, ст. 11 – 19; гл. 64, ст. 1 – 5]

Тако глаголет Господь: где возведѣй *от земли пастыря овец своих? Где есть вложивый в них Духа Святаго? Возведшая десницею Моисеа, мышца славы Его раздели воду пред Лицем Его, сотворити Ему имя вечно. Проведе их сквозе бездну, якоже коня сквозе пустыню, и не утрудисѣся, и яко скоты по полю: и сниде Дух от Господа, и настави их. Тако провел еси люди Твоя, сотворити Тебе Самому имя славно. Обратисѣ, Господи, от небесе, и виждь от дому святаго Твоего и славы Твоея: где есть ревность Твоя и крепость Твоя? Где есть множество милости Твоея и щедрот Твоих, яко терпел еси нам? Ты бо еси Отец наш, понеже Авраам не уведѣ нас, и Израиль не позна нас, но Ты, Господи, Отец наш, избави ны, исперва имя Твое на нас есть. Что уклонил еси нас, Господи, от пути Твоего, и ожесточил еси сердца наша, еже не боятися Тебе? Обратисѣ ради раб Твоих, ради племен достоянїя Твоего, да (поне) мало наследим горы святыя Твоея. Противницы наши попраша святыню Твою: быхом яко исперва, егда не владел

еси нами, ниже бе наречено имя Твое на нас. Аще отверзеши небо, трепет примут от Тебе горы и растают, яко тает воск от лица огня, и попалит огонь супостаты, и явлено будет имя Твое в сопротивных Твоих: от Лица Твоего языцы возьмутся. Егда сотвориши славная, трепет примут от Тебе горы. От века не слышахом, ниже очи наши видеша Бога, разве Тебе, и дела Твоя, яже сотвориши ждущим милости. Милость бо срящет творящих правду, и путие Твои помянутся. [* В неких: от моря]

Пророчества Иеремиина чтение. [Гл. 31, ст. 31 – 34]

Тако глаголет Господь: се дние грядут, и завещаю дому Израилеву и дому Иудину завет нов, не по завету, егоже завещах отцом их в день, вонже емшу Ми за руку их, извести я от земли Египетския: яко тии не пребыша в завете Моем, и Аз небрегох их, глаголет Господь. Яко сей завет, егоже завещаю дому Израилеву по днех оных, глаголет Господь: дая законы Моя в мысли их, и на сердцах их напишу я, и буду им в Бога, и тии будут Ми в люди. И не научит кийждо ближняго своего и кийждо брата своего, глаголя: познай Господа: яко вси познают Мя от мала даже и до великаго их: яко милостив буду неправдам их, и грехов их не помяну ктому.

Пророчества Даниилова чтение. [Гл. 3, ст. 1 – 88]

В лето осмонадесатое Навуходоносор царь сотвори тело злато, высота его лактей шестидесяти, и широта его лактей шести: и постави е на поли Деире, во стране Вавилонстей. И посла [Навуходоносор царь] собрати ипаты, и воеводы, и местоначальники, вожди же и мучители, и сущия на властех, и вся князи стран, приити на обновление кумира, егоже постави Навуходоносор царь. И собращася местоначальницы, ипаты, воеводы, вожди, мучители велицыи, иже над властьюми, и вси начальницы стран на обновление тела, еже постави Навуходоносор царь: и сташа пред телом, еже постави Навуходоносор царь. И проповедник вопияше с крепостию: вам глаголется, народи, людие, племена, языцы: вонже час аще услышите глас трубы, свирели же и гусли, самвики же и псалтири, и согласия, и всякаго рода мусикийска, падающе покланяйтеся телу златому, еже постави Навуходоносор царь: и иже аще не пад поклонится, в той час ввержен будет в пещь огнем горящую. И бысть егда услышаша людие глас трубы, свирели же и гусли, самвики же и псалтири, и согласия, и всякаго рода мусикийскаго, падающе вси людие, племена, языцы, покланяхуся телу златому, еже постави Навуходоносор царь. Тогда приступиша мужие халдейстии и оболгаша иудеев, отвецавше реща Навуходоносору цареви: царю, во веки живи. Ты, царю, положил еси повеление, да всяк человек, иже аще услышит глас трубы, свирели же и гусли, самвики же и псалтири, и согласия, и всякаго рода мусикийска, и не пад поклонится телу златому, ввержен будет в пещь огнем горящую. Суть убо мужи Иудее, ихже поставил еси над делы страны Вавилонския, Седрах, Мисах и Авденаго, иже не послушаша заповеди твоя, царю, и богом твоим не служат, и телу златому, еже поставил еси, не покланяются. Тогда Навуходоносор в ярости и гневe рече привести Седраха, Мисаха и Авденаго: и приведени быша пред царя. И отвеца Навуходоносор, и рече им: аще воистинну, Седрах, Мисах и Авденаго, богом моим не служите, и телу златому, еже поставих, не покланяетесь? Ныне убо,

аще есте готови, да егда услышите глас трубы, свирели же и гусли, самвики же и псалтири, и согласия, и всякаго рода мусикиискаго, падше поклонитесь телу златому, еже сотворих: аще же не поклонитесь, в той час ввержени будете в печь огнем горящую: и кто есть бог, иже измет вы из руки моея? И отвечаша Седрах, Мисах и Авденаго, глаголюще царю Навуходоносору: не требе нам о глаголе сем отвещати тебе: есть бо Бог наш на небесех, Емуже мы служим, силен изъяти нас от печи огнем горящая и от руку твоею избавити нас, царю: аще ли ни, ведомо да будет тебе, царю, яко богом твоим не служим, телу златому, еже поставил еси, не кланяемся. Тогда Навуходоносор исполнися ярости, и зрак лица его изменися на Седраха, Мисаха и Авденаго, и рече: разжгите печь седмерицею, дондеже до конца разгорится. И мужем сильным крепостию рече: оковавше Седраха, Мисаха и Авденаго, вверзите в печь огнем горящую. Тогда мужие онии оковани быша с гащами своими, и покрывалы, и сапогми, и со одеждами своими, и ввержени быша посреде печи огнем горящая. Понеже глагол царев превозможе, и печь разжжена бысть преизлишше: и мужей оных, иже ввергоша Седраха, Мисаха и Авденаго, уби пламень огненный. И мужие тии трие, Седрах, Мисах и Авденаго, падоша посреде печи огнем горящая оковани: и хожду посреде пламене, поюще Бога и благословяще Господа. И став с ними Азария помолися сице, и отверз уста своя посреде огня, рече:

[Молитва:]

Благословен еси, Господи Боже отец наших, хвально и прославлено имя Твое во веки. Яко праведен еси о всех, яже сотворил еси нам, и вся дела Твоя истинна, и прави путие Твои, и вси суди Твои истинни: и судьбы истинны сотворил еси по всем, яже навел еси на ны и на град святой отец наших Иерусалим: яко истинною и судом навел еси сия вся на ны грех ради наших. Яко согрешихом и беззаконновахом отступивше от Тебе, и прегрешихом во всех. И заповедей Твоих не послушахом, ниже соблюдохом, ниже сотворихом, якоже заповедал еси нам, да благо нам будет. И вся, елика сотворил еси нам, и вся, елика навел еси на ны, истинным судом сотворил еси. И предал еси нас в руки врагов беззаконных, мерзких отступников, и царю неправедну и лукавейшу паче всея земли. И ныне несть нам отверсти уст: студ и поношение быхом рабом Твоим и чтущим Тя. Не предажь убо нас до конца имене Твоего ради, и не разори завета Твоего, и не остави милости Твоея от нас, Авраама ради возлюбленнаго от Тебе, и за Исаака раба Твоего, и Израиля святого Твоего, имже глагола еси умножити семя их, яко звезды небесныя и яко песок вскрай моря. Яко, Владыке, умалихомся паче всех язык, и есмы смирени по всем земли днесь грех ради наших. И несть во время сие князя, и пророка, и вождя, ниже всесожжения, ниже жертвы, ниже приношения, ниже кадила, ни места, еже пожрети пред Тобою и обрести милость: но душею сокрушенною и духом смиренным да прияти будем. Яко во всесожжениях овних и юнчих, и яко во тмах агнец тучных, тако да будет жертва наша пред Тобою днесь, и да совершится по Тебе, яко несть студа уповающим на Тя. И ныне возследуем всем сердцем, и боимся Тебе, и ищем Лица Твоего. Не посрами нас, но сотвори с нами по кротости Твоей и по множеству милости Твоея. И изми нас по чудесем Твоим, и даждь славу имени Твоему, Господи. И да посрамятся вси являющии рабом Твоим злая, и да постыдятся от всякия силы, и крепость их да

сокрушится: и да разумеют, яко Ты еси Господь Бог Един и славен по всей вселенной.

И не престаша ввергнуши их слуги царевы, жгуще печь наффою, и смолою, и изгребми, и хврастием. И разливашеся пламень над пещию на лактий сорок четыре: и обыде и пожже, ихже обрете окрест пещи халдейския. Ангел же Господень сниде купно с сущими со Азариєю в пещь, и отрясе пламень огненный от пещи, и сотвори среднее пещи яко дух росы шумящъ: и не прикоснуся их отнюдь огонь, и не оскорби, ниже стужи им. Тогда тии трие яко едиными усты пояху, и благословляху, и славяху Бога в пещи, глаголюще:

Благословен еси, Господи Боже отец наших, и прпетый и превозносимый во веки: и благословено имя славы Твоя святое и прпетое и превозносимое во веки. Благословен еси в храме святя славы Твоя, и прпетый и превозносимый во веки. Благословен еси, видяй бездны, седяй на Херувимех, и прпетый и превозносимый во веки. Благословен еси на престоле славы Царствия Твоего, и прпетый и превозносимый во веки. Благословен еси на тверди небесней, и прпетый и превозносимый во веки.

Востаем зде и поем: Господа пойте и превозносите во вся веки.

Чтец же глаголет стихи:

Благословите, вся дела Господня,

И мы: Господа пойте и превозносите во вся веки.

Благословите, Ангели Господни,

Господа пойте и превозносите во вся веки.

Благословите, небеса,

Господа пойте и превозносите во вся веки.

Благословите, воды вся, яже превыше небес,

Господа пойте и превозносите во вся веки.

Благословите, вся силы Господни,

Господа пойте и превозносите во вся веки.

Благословите, солнце и луна,

Господа пойте и превозносите во вся веки.

Благословите, звезды небесныя,

Господа пойте и превозносите во вся веки.

Благословите, всяк дождь и роса,

Господа пойте и превозносите во вся веки.

Благословите, вси дуси,

Господа пойте и превозносите во вся веки.

Благословите, огонь и вар,

Господа пойте и превозносите во вся веки.

Благословите, студь и зной,

Господа пойте и превозносите во вся веки.
Благословите, росы и иней,
Господа пойте и превозносите во вся веки.
Благословите, нощи и дние,
Господа пойте и превозносите во вся веки.
Благословите, свет и тьма,
Господа пойте и превозносите во вся веки.
Благословите, лед и мраз,
Господа пойте и превозносите во вся веки.
Благословите, сланы и снези,
Господа пойте и превозносите во вся веки.
Благословите, молния и облацы,
Господа пойте и превозносите во вся веки.
Да благословит земля,
Господа пойте и превозносите во вся веки.
Благословите, горы и холми,
Господа пойте и превозносите во вся веки.
Благословите, вся прозябающая на земли,
Господа пойте и превозносите во вся веки.
Благословите, источницы,
Господа пойте и превозносите во вся веки.
Благословите, моря и реки,
Господа пойте и превозносите во вся веки.
Благословите, кити и вся движущаяся в водах,
Господа пойте и превозносите во вся веки.
Благословите, вся птицы небесныя,
Господа пойте и превозносите во вся веки.
Благословите, зверие и вси скоти,
Господа пойте и превозносите во вся веки.
Благословите, сынове человечестии,
Господа пойте и превозносите во вся веки.
Да благословит Израиль,
Господа пойте и превозносите во вся веки.
Благословите, иереи Господни,
Господа пойте и превозносите во вся веки.
Благословите, раби Господни,
Господа пойте и превозносите во вся веки.
Благословите, дуси и души праведных,

Господа пойте и превозносите во вся веки.

Благословите, преподобнии и смиреннии сердцем,

Господа пойте и превозносите во вся веки.

Благословите, Анания, Азария и Мисаил,

Господа пойте и превозносите во вся веки.

Благословите, апостоли, пророцы и мученицы Господни,

Господа пойте и превозносите во вся веки.

Благословим Отца, и Сына, и Святого Духа,

Господа пойте и превозносите во вся веки.

И ныне, и присно, и во веки веков, аминь.

Господа пойте и превозносите во вся веки.

Хвалим, благословим, покланяемся Господеви,

Поюще и превозносяще во вся веки.

Таже ектения малая.

Вместо же Трисвятаго: **Е**лицы во Христа креститесь:

Прокимен, глас 8: Вся земля да поклонится Тебе и поет Тебе, * да поет же имени Твоему, Вышний.

Стих: Воскликните Господеви, вся земля, пойте же имени Его.

Апостол к Римлянам, зачало 91:

Братие, елицы во Христа Иисуса крестихомся, в смерть Его крестихомся. Спогребохомся убо Ему крещением в смерть: да якоже воста Христос от мертвых славою Отчею, тако и мы во обновлении жизни ходити начнем. Аще бо сообразни быхом подобию смерти Его, то и воскресению будем. Сие ведяще, яко ветхий наш человек с Ним распялся, да упразднится тело греховное, яко ктому не работати нам греху. Умерый бо, оправдися от греха. Аще ли умрохом со Христом, веруем, яко и живи будем с Ним, ведяще, яко Христос воста от мертвых, ктому уже не умирает, смерть Ему ктому не обладает. Еже бо умре, греху умре единою, а еже живет, Богови живет. Такожде и вы помышляйте себе: мертвым убо быти греху, живым же Богови, о Христе Иисусе, Господе нашем.

Аллилуиа и псалом Давидов не глаголется: но по еже решити иерею: Мир ти, абие чтец глаголет, вместо аллилуиа:

Глас 7: Воскресни, Боже, суди земли, яко Ты наследилши во всех языцех.

И певцы поют тожде:

И чтец, стих: Бог ста в сонме богов, посреде же боги разсудит.

И певцы: Воскресни, Боже, суди земли, яко Ты наследилши во всех языцех.

Стих: Доколе судите неправду и лица грешников приемлете?

И певцы: Воскресни, Боже, суди земли, яко Ты наследилши во всех языцех.

Стих: Судите сиру и убогу, смиренна и нища оправдайте.

И певцы: Воскресни, Боже, суди земли, яко Ты наследилши во всех языцех.

Стих: Измите нища и убога, из руки грешничи избавите его.

И певцы: Воскресни, Боже, суди земли, яко Ты наследилши во всех языцех.

Стих: Не познаша, ниже уразумеша, во тьме ходят.

И певцы: Воскресни, Боже, суди земли, яко Ты наследилши во всех языцех.

Стих: Да подвижатся вся основания земли. Аз рех: бози есте, и сынове Вышняго вси. Вы же яко человецы умираете и яко един от князей падаете.

И паки: Воскресни, Боже, суди земли, яко Ты наследилши во всех языцех.

Егда же поют: Воскресни, Боже, суди земли, тогда иереи и диаконы извлачаются от черных одежд и облачаются в белыя.

Евангелие от Матфея, зач. 115:

В вечер субботный, свитающи во едину от суббот, прииде Мариа Магдалина и другая Мариа, видети гроб. И се, трус бысть велий: Ангел бо Господень спед с небесе, приступль отвали камень от дверей гроба и седяше на нем. Бе же зрак его яко молния, и одеяние его бело яко снег. От страха же его сотрясошася стрегущии и быша яко мертви. Отвещав же Ангел рече женам: не бойтеся вы, вем бо, яко Иисуса распятаго ищите. Несть zde, воста бо, якоже рече, приидите, видите место, идеже лежа Господь, и скоро шедше рцыте учеником Его, яко воста от мертвых и се, варяет вы в Галилеи, тамо Его узрите, се рех вам. И изшедше скоро от гроба со страхом и радостию велиею, текосте возвестити учеником Его. Егда же идясте возвестити учеником Его, и се, Иисус сrete я, глаголя: радуйтеся. Оне же приступльше ястеса за нозе Его и поклонистеса Ему. Тогда глагола има Иисус: не бойтеся, идите, возвестите братии Моей, да идут в Галилею, и ту Мя видят. Идущема же има, се, нецыи от кустодии пришедше во град, возвестиша архиереом вся бывшая. И собравшеса со старцы, совет сотвориша, сребреники доволны даша воином, глаголюще: рцыте, яко ученицы Его нощию пришедше украдоша Его, нам спящим. И аще сие услышано будет у игемона, мы утолим его и вас безпечальны сотворим. Они же приемше сребреники, сотвориша, якоже научени быша. И промчеса слово сие во Иудеех даже до сего дне. Единии же надесеяте ученицы идоша в Галилею, в гору, аможе повеле им Иисус, и видевши Его, поклонишася Ему, ови же усумнешася. И приступль Иисус, рече им, глаголя: дадеса Ми всяка власть на небеси и на земли. Шедше убо научите вся языки,

крестяще их во имя Отца и Сына и Святаго Духа, учаще их блюсти вся, елика заповедах вам, и се Аз с вами есмь во вся дни до скончания века. Аминь.

И по чину Божественная литургия Великаго Василиа. Вместо же Херувимския песни поется настоящий тропарь,

Глас 8:

Да молчит всякая плоть человека и да стоит со страхом и трепетом, и ничтоже земное в себе да помышляет: Царь бо царствующих и Господь господствующих приходит заклатися и датися в снедь верным. Предходят же Сему лица Ангельстии со всяким Началом и Властию, многоочитии Херувими и шестокрилатии Серафими, лица закрывающе и вопиюще песнь: аллилуиа, аллилуиа, аллилуиа.

Причастен, глас 4: Воста яко спя Господь, и воскресе спасаяй нас.

Аллилуиа, трижды.

По отпусте же дается от священника антидор, Таже бывает благословение хлеба и вина.

Долженствует же еклисиарх имети опасство, да егда скончается литургия, будет час второй нощи. По отпусте же не исходим из церкви, но седим на местех наших: и входит келарь, и дает братии по единому укруху хлеба и по шести смоквей или фиников, и по единому красовулю вина. Нам же возлежащим, бывает чтение великое в Деяниях святых Апостол от начала. Глаголет же чтец начало. Священник же стих: Молитвами святых апостол, Господи Иисусе Христе Боже наш, помилуй нас. И по Амине начинает чтец чести. Таже начинаем ясти. И по скончании чтения вжигает кандилувжигатель вся кандила храма, и, исходя, ударяет в клепало: и престаает чтый чтение. Благословившу же священнику, начинает Трисвятое, и прочее. Приидите, поклонимся, трижды. Псалом 50. И канон Великия Субботы: ирмосы по дважды, тропари же на дванадесять, со стихи песней. Катавасиа, ирмос оба лика. По третней песни седален Великия Субботы: Гроб Твой, Спасе: И чтение в слове святаго Елифания, егоже начало: Что сие днесь: Или от словес Златоустаго: ищи я в толковании на Евангелие от Матфеа, или на Иоанна, словеса воскресная. По 6-й песни кондак и икос Великия Субботы. Таже чтение. По 9-й же песни Трисвятое. И тропарь, глас 2: Егда снизшел еси: Ектения. И отпуст.